

Lwiiyo Lwakucitila Kung'anda

KWIIYA
*Kulacitika
mumasena oonse,
aciindi cili coonse
alimwi kubantu
boonse*



EENET – Enabling Education Network
PO Box 422
Hyde
Cheshire
SK14 9DT
UK

 www.eenet.org.uk

 info@eenet.org.uk

 +44 (0)7929 326 564



This work is licensed under the Creative Commons Attribution-NonCommercial-ShareAlike 4.0 International License. To view a copy of this license, visit <http://creativecommons.org/licenses/by-nc-sa/4.0/>

Pepa lyazili mukati

Matalikilo	4
Bumbi bwakubelesya maciti kubana beelete kuyisigwa bwaandeene abana bapona abulema na balema	6
Mundando wa maciti na zyakucita	8-73
Buku lya ABC	8
Kuyaka bulambwa na Ng'anda ndamfwu	10
Yaka cisinkilila aindwa	11
Cisolo cakusanganya-sanganya	13
Kujika a myeelwe na manamba	16
Kubamba cisobano acintu ciyumuyumu	18
Sena ulicibwene ncendibwene?	20
Zekula na enga munyama utanabwenwe ngoyeeya mumutwe wako	21
Zekula na enga dolopo pati ndyoyeyela buyo	23
Nzyoyandisisya	25
Ibula bwaato bwako	27
Kuya kumushika na kumaliketi	28
Ino ali ongaye mabala...?	30
Nindali musololi na muleli wacisi...	31
Buzyabuzya na ambaula amuntu mupati	33
Kulipangila chibelesyo (chibelesyo na munchini)	35
Kubumba kubelesya zintu zisowedwe	37
Kulemba mundando wazintu nzyoyanda	39
Bamba maapu na munyinza wabusena mbokkala	40
Kusuma cidooli caambaula kubelesya sookesi	42
Cisolo na cisobano cakubalila	44
Kweebela Zilengwaleza	46
Lwiimbo lypy, mujwi lyakaindi	49
Kweema kutaambi cintu cilimvwisy (Kutabujuli akubujula)	50
Shanga nseke akwiilangilila mboikomena	53
Kubala antoomwe	55
Kuvwima cintu ncoyandisisya	58
Namba yamaseseke (Mpasulula balozi)	60
Bube bwazintu a mapatani aali munyika	62
Caano cizunguluka kwaana	64
Ikulumba muntu ulaampuwo mucooko	66
Kuvwima cintu ciyandisi	67
Mibuzyo iili makumi obilo	69
Kulembela bayi bako lugwalo	71

Matalikilo

Ino aaya maciti akabambilwa bani?

- Aaya maciti akabambilwa bantu boonse mumikwashi bajisi abatajisi bana balaa bulema.
- Aaya maciti ngamuntuwoonse – bamamama abamatata, basikulanga bana, basimbi abasankwa, bakubushi, banabokwabo (basankwa a basimbi), baneene aba syaanene, baisha abakaintu bana bokwabo abataata abaama. Kuli coolwe cinji ncotukonzya kujana cakuti twiiye antoomwe.

Ino zyakucita eezi na maciti aaya ncinzi?

Aaya maciti '**nkanzuma kasangene**' kazwide zyakucita zya basimbi abasankwa balaa myaaka na misela yoonse kusanganya abazyali babo, basikulanga bana a mikwashi kutegwa bacikonzye kucitila kung'anda. Kufumbwa muntu ulakonzya kubelesya mizeezo yakwe abusungu kuyungizya amaciti aapedwe. Bunji bwamaciti aaya alakonzya kucitwa ziindi zinji munzila zimbi ziindeneindene.

Ino aaya maciti akalengelwa na kupangilwa nzi?

Aaya maciti na zyakucita eezi zilagwasilizya nzila zinji ziindeneindene bana mbobakonzya kwiiya na mbobaiya ciindi nobali kung'anda. Ndiza inga mwaziyeeya zyakucita zimwi eezi nkaambo bana benu balazisobana kale. Eezi zyakucita zilagwasya mikwashi kuzyiba masimpe mbuli kwiiya kwakung'anda mbokubede alimwi mbuli kuiyla kung'anda mbokukonzya kusumpula lwiiyo lucitikila kucikolo.

Mbokonzya kubelesya maciti aaya na zyakucita eezi

Amulange maciti aaya na zyakucita eezi amwana wenu. Amulekele mwana wenu kuti asale zyakucita na cakucita cimukomanisy na ncayandisisya. Zyakucita zili mubbuku oomu tafisungilizigwi kuzitobela kuzicita mbubonya mbozitobelana kulembwa pe.

Nkotuli twaambo tupedwe kweendelanya aamwi maciti na acimwi cakucita, mbuli boobu:

Zibelesyo ziyandika: aka kabbokesi katondezya zintu nzyomweelede kulibambila azibelesyo ziyandika kutegwa mucikonzye kucita maciti na zyakucita zipedwe. Zimwi zyakucita taziyandi azibelesyo pe, zimwi ziyanda zyilembyo mbuli pensulo azyakulembela mbuli mapepa, naanka zintu zyakasowegwa zyakabelekede kale azimwi buyo zintu zinga zyajanika mumasena motukkala zyalo zitayandiki kuula buya nkaambo zyakubweza buyo.

Cakucita na zyakucita: aaya malailile aalemedwe kutegwa mwana akonzye kucilila ncayebolede kucita. Bana bakonzya kulibalila balakonzya kutobeleyza ntaamu zyamaciti lwabo beni. Bamwi bana bayandika kugwasilizyigwa kuzwa kubanabokwabo bapati naanka bapati balo bakonzya kubala.

Kwiindilizya kucita maciti apedwe: zimwi ziindi kulipedwe maciti na zyakucita ziindilide kutegwa bana bapati naanka bana bainda busongo bakonzye kucita lwiiyo lusumpukide ali loolo ludedwe.

Ansi buyo amaciti na zyakucita zipedwe kuli twaambo tupedwe kutegwa mugwasigwe kusala maciti na zyakucita zyeendelana amwana wanu, ootu twaambo tujisi:

Musela: aaka kaambo kasola kwaamba musela maciti na zyakucita ngozyeelela, pele bunji bwaziindi bana bamisela yoonse balakonzya kucita maciti aaya. Iiyi bana ncobakonzya kupanga na kubamba inga kaciindene, kupa buyo mukozyanyo bana bapati-pati inga balemba bulembu bunji, naanka kuzekula na kweenga zilibonya kwiinda bana bacilli baniini.

Kugwasilizya kwa bapati/banabokwanu: ootu twaambo tusola kupa muzeezo wakuti na uli mupati noba musankwa na musimbi ulakonzya kugwasya bana basyoonto asyoonto buyo naanka mubunji, naanka kuti kabakonzya inga bacita zyakucita eezi bolikke kaatakwe lugwasyo. Ootu twaambo tulakonzya kukugwasya kuyeeya kuti na ulelede kuba munsimunsi amwana ciindi nacita zyakucita eezi nokuba kuti inga kocita cimwi cintu mbuli mupati. Nywebo mbuli bapati nokuba banabokwabo cimwi ciindi mweelede kugwasya kunji kapati kubana bayanda lugwasyo ciindi nobaiya naanka bajisi na bapona abulema.

Lwiiyo ndotijane akwiya (Luzyibo) a Nzyoyelede kusola kucita

(Bunkutwe): acimwi cakucita cigwasilizya mwana kuti ayungizye luzyibo, naanka bunkutwe naanka kwiiya zyakukutauka zinyowana. Aaka kabbokesi kalaansi amaciti aamwi apedwe katondezya luzyibo a bunkutwe bujanika muzyakucita zipedwe muciiyo acimwi. Bunji bwamaciti na zyakucita ziatikizya kupanga na kubamba, kuyaka naanka kutalika buya kulenga cintu calo cigwasilizya mwana wenu kukonzya kusoleka kuliiya na kucita zintu zyikutaukwa. Eezi zikutaukwa zisanganya zintu mbuli kukwabana kabotu mumyaambo, kubelekelaamwi (kubeleka antoomwe abamwi bantu), kusungwaala, kumana mapenzi na makatazyo, kuyeeya kwiindilide a kubamba zintu mbozyeelede kuba. Zikolo abamaiyi balizyi oobu bunkutwe mbobuli bupati kumuntu. Ibana tabajisi ciindi cinji cakuliiya kujatikizya zintu zikutaukwa ciindi nobali kucikolo. Pele nobali kung'anda balajana coolwe aziindi zyakwiya kwiinda mukusobana a kucita zintu zinji zicitwa abuzuba mbuli kujika.

Bumbi mbokonzya kucita maciti aaya: bunji bwamaciti na zyakucita ziatikizya mizeezo mbuli mbomukonzya kubelesya lwiiyo naanka kucinca maciti apedwe kutegwa lwiiyo lweelele akumwana utalikonzezyi kwiiya alikke naanka upona na ujisi bulema. Zyonse zyakucita zili mubbuku oomu zilakonzya kucitwa amwana uli oonse, pele bana bamwi balakonzya kuzicita kwiinda mukubagwasilizya asyoonto naanka balakonzya buyo kucita maciti aaya munzila imwi (mbuli kuzekula na kweenga naanka kwambaula buya kwiinda kulemba; naanka kucuubyaubya cakucita). Mupepa licilila lilatwaambila mizeezo imbi mbotukonzya kubelesya cakucita na zyakucita zipedwe. Mbokunga mulimuzi kabotu mwana wenu nkokuti mulizi lwiiyo lukonzya kumubelekela ambwakonzya kwiiya kabotu.

Mutalubi, kwiiya kulakonzya kucitika kufumbwa mpobede, ciindi coonse.

Bumbi bwakubelesya maciti kubana beeledé kuyiisigwa bwaandeene abana bapona abulema na balema

Kabbokesi kalaansi acakucita na zyakucita zipedwe kappa mizeezo mbuli mbomukonza kucinca naanka bumbi mbomukonza kucita maciti kubana beeledé kuyiisigwa bwaandeene abana bapona abulema na balema. Aumwi mwana kulimbabede nkokuti mizeezo eeyi taili yacigaminina kumwana omwe. Bunji bwaziindi mwana ulakonza kututondezya zintu nzyayanda kuti aiye kabotu. Twabazyiba kabotu-kabotu bana, inga twacikonza kubagwasya kabotu a kuzyiba zintu nzyobakonza kucita kabotu-kabotu, zintu nzyobayandisisya kucita azintu nzyobayanda kugwasigwa na nzyotweelede kubagwasya.

Cili buyo kabotu kugwasya bana benu, pele amubone masimpe kuti tamuli ndinywe mucita maciti apedwe na tamuli ndinywe 'mubacitila' – beeledé kulimvwa mbuli kuti nkocili ncobajana lwabo beni. Mutayeeyi kuti mwana kwiina ncazyi alimwi takonzyi kucita maciti apedwe. Mulakonza kujana nzila zimbi zisungweede zyakukonza kucita maciti kutegwa kufwumbwa muntu kakonza kucita maciti apedwe.

Munsi oomu kuli mizeezo minjaanji ipedwe kujatikizya bana bajisi bulema bwacigaminina naanka balaa mapenzi mukwiiya kwabo. Eeyi mizeezo ilakonza kubelesegwa kufwumbwa mumaciti aapedwe.

Bana bataboni kabotu na balaa mapenzi ameso

- **Belesya mabala mapati:** kuti cakucita cijatikizya kulemba, langa-langa na mwana cilamuubila kubala mabala mapati naanka tubala tusyoonto. Pele cimwi ciindi tubala tusyoonto tubeleka kabotu, nkaambo akamwi 'nkobuli mbokabambidwe' bwaandeene alimwi tatukozyanyi mbuli 'mabala mapati' alo ubala ngaubilwa-ubilwa kubala akuzyiba nkaambo taakozyanyi pe.
- **Belesya mibala (Misyobo-misyobo):** belesya mubala na musyobo waandeene, kuti kacikonzeka, kulemba mabala avwula kujanika mukuyaka mizila yamabala, (kupa mukozyanyo, mabala mbuli 'a' a/naanka mabala aatondezya cakucita mbuli bbala 'amba' 'leta' a 'kupa'). Eeci inga cilapa kuti kubala naanka kulemba kuubeube kumwana.
- **Belesya zibelesyo zijatwa amaanza** kutegwa ukonzye kubamba na kuyaka zintu, kutegwa bana balaa mapenzi kubona kabotu bakonzye 'kujataata' a 'kuguma' cintu ncobasola kupanga na kubamba. (Kupa buyo mukozyanyo, kuyaka bulambwa na ng'anda ndamfwu kubelesya zyibelesyo zipangidwe azintu ziindeneindene).
- Koyeeya kuti, eeyi mizeezo ilakonza kugwasya bana boonse, kutali buyo bana balaa mapenzi akulanga na kubona kabotu.

Bana batamrwi kabotu na balaa mapenzi amatwi.

- **Kubelesya maanza kwaambaula (masaini)** kuti kamucizyi na kamucikonza kubelesya maanza amwana wenu.
- **Kulangana busyu-kibusyu amwana** walo utamvwi kabotu alimwi utakonzyi kwaambaula zilimvwisia (mutapozomoki buy ape). **Amubelesye mubili kusola kwaamba cimwi,**

amutondezye ncomusola kukanana kubelesya busyu bwenu alimwi akutambaika maanza kutegwa mucikonzye kukwabana mumyaambo akwaamba ceeco ncomusola kwaamba.

- Amusoleke kucitila maciti abusena abalangala, kutegwa mwana akonzye kuubona mulomo wako mwanoambaula. Amwaambaule cakutafwambaana alimwi cakutamukila limwi alimwi cakutagabagaba na kubbabbalika.
- Belesya zilembyo mbuli pensulo amapepa (naanka nchoko acipulanga na cisenke) mwanoocita maciti apedwe kutegwa mulembe, naanka kuzekula na kweenga zifwanikiso kusola kupandulula cimwi cintu.
- Kamuyeeya kuti, imwi mizeezo eeyi ilakonzya kugwasya bana boonse, kutali buyo baabo balaa mapenzi kumvwa kabotu na batamvwi kabotu.

Bana bateendi kabotu na balaa mapenzi kweenda

- **Amuyobole zyakubelesya na zibelesyo munsi-munsi:** amubone masimpe kuti zintu nzyomuyanda kubelesya mu zyakucita ziliyobwedwe abusena bana mpobakonzya kusika kubweza kuti babelesye.
- **Amusole kubelesya zintu eezi mbuli mbozili zipati na zisyoonto kutegwa mugwasilizye bana kusola kuzibelesya kabotu mbozyeelede.** (Kupa mukozyanyo, pensulo azilembyo zimbi zipati inga zyaubauba kujata mumaanza)
- **Kutondezya a kugwasilizya** aawo ayelede, (Kupa mukozyanyo, mweelede kugwasya bana nobawaala nzukunzuku nobasobana cisolo caacipulanga.)
- **Cesyacesya busena bwakuyiila:** Cinca zyakucita na maciti kutegwa zyikonzyeke kicitwa mukasena kasyoonto, kucesya kweendeenda, (Kupa buyo mukozyanyo, maciti a kuvwima kwahikube na kulangaula cintu ciyandisi alakonzya kicitwa mubusena bomwe na mukaanda komwe kwiinda kwaacitila mung'anda mpati naanka anze.

Bana batola ciindi cilamfwu kwiiya

- **Ubauby a cakucita** alimwi ucite buyo kabeela kacakucita. (Kupa mukozyanyo, koimba buyo kabeela na kapaanzi komwe mulwiimbo lutegwa 'Lwiimbo lupy, mujwi lyakaindi', kutali zipaanzi zyotatwe; lemba kandando kazintu kafwafwi mucakucita ca 'kubamba mundando wazintu'. Mwana wako inga alimwi walemba ibbala lyomwe kutali muzila woonse wamabala kutondezya muzeezo wakwe.
- **Zekula na enga kwiinda kulemba.** Bunji bwazyakucita na maciti apedwe alijisi zijatikizya kuzekula na kweenga. Kumaciti alo aayo ayanda bana kuti balembe, balakonzya kuzekula na kweenga mizeezo kwiinda kulemba.
- **Kucesyacesya zibela zyamalailile** kwaabikka mutubeelabeela tuubauba akwaambila mwana kuti aacite muzibeelabeela aciindi comwe-comwe. (Kupa mukozyanyo, 1) lutaanzi bweza pensulo apepa, 2) wamana zekula na enga cimwi cintu, 3) wamana uzilezile mubala na musyobo umwi mucintu eco, 4) umanizye akuzilemba zibeeleabeela zyacintu ncoozekula.)
- **Induluka malailile** ziindi zyobilo na zyotatwe kutegwa mwana acikonzye kuswiilila akumvwa kabotu twaambo tweede kucita.


Muysiindi zyoonse amulekele bana kuti basolole mbabo mulizyoonse. Inga bana balakonzya kumutondezya kuti naa bamvwa, alimwi na balacyanda kucita maciti naanka kuti tabayandi. Nkokuti amupe kugwasilizya kubombe pele mutabaminyi pe bana. Cilikabotu kuzumina kuti cakucita nciyumu akucicita kuti cibe cakucita cabantu banji na muntu munji. Mulakonzya kwaamba kuti "Ede kayi cakucita eeci cilibonya mbulikuti nciyumu? Sena tusole kucicita antoomwe cakucita eeci?"

Buku lya ABC

Zibelesyo ziyandika: Zyilembyo na pensulo (zyamisyobo-misyobo, na kazilik) pepa, chakunamatizya naanka nyeleti a ntali

Cakucita na zyakucita:

- Bweza mapepa a zilembyo mbuli pensulo mukulibambila.
- Kovwunga tubeela twamapepa kategwa ubambe na upange bbuku lya aufabbeti. Ino inga kulayandika mapepa ongaye?
- Koyeeya mumizeeo yako mbotizekule na kweenga tubala twa aufabbeti. Sena komwe kabala a pepa lyomwe? Obile mabala? Sena azifwanikiso zya zintu/banyama balaamazyina atalisya atubala twa aufabbeti?
- Yeeyela mumutwe a kuzekula na kweenga acipepa citaanzi/ caatala lya bbuku. Utalubi kubikka na kulemba zyina lyako mbuli 'sikwaanza' (mulembi wa bbuku)
- Koyeeya mboyelede kuzekula na kweenga tubala twa aufabbeti. Sena tubala ootu tulalibonya mbuli tuntu tukotede na mbuli tutambo twa loozi? Kuti kojisi zilembyo zyamisyobo-misyobo inga watuzila-zila misyobo eeyi.
- Lemba mabala aatalisya a kabala ka aufabbeti a pepa lyomwe-lyomwe.
- Kovwunga bbuku naanka ulombe bapati kuti bakusumine mapepa antoomwe kubelesya ntali a nyeleti naanka kubelesya bulimbo bwacikuwa kategwa mapepa ajatane kuba bbuku.



Kwiindilizya kucita maciti apedwe:

- Kobala cakupozomoka, naanka kulomba umwi muntu kuti akubalile caano/kaano kali munsi omu.

Manyongwe munyika ya aufabetti

Bumwi buzuba bana bamayanga na bampuundu 'e' a 'e' bakayeeya kuti balikkominsye. Nkabela bakayeeya kuti banjile akati kamabala aayo oonse ngobakalikuyeeya. Bakasandula bbala 'ship' kuba bbala 'sheep' cakapa kuti mbelele itete cakwiindilila a kunyongana. Bakasandula bbala 'chick' kuba bbala 'cheek' cakapa kuti nkuku nseke yakalaa bana ibbizye zuba kuyandaula kakuku kayo. Bakasandula bbala 'stir' kucinca kuba 'steer' cakapa kuti sikujika atazyibi ncaakali kucita. Bakasandula bbala 'will' kuba bbala 'wheel' cakapa kuti litendeleke kuselela kuya mucilundu. Aaba bana bampuundu bakaseka citaambiki. Pele tumwi tubala twa aufabetti tiitwakayeeya kuti ncobakali kuseka cakali cintu cibotu alimwi cikondelezya pe. Mukumanizya, silutwe na mupatipati wa tubala twa aufabetti wakati. Mbubo lino, aavwula mabi. Mpoonya wakababikka akati kabbala 'slip' akubatanda kuti kamuya ku 'sleep'.

- Sena ulakonzya kubamba na kupanga kaano/caano omwini kujatikizya tubala tujanwa munyika ya aufabetti?

Musela: Bbana baku Primary

Kugwasilizya kwa bapati/banabokwanu: Kwaakatikati

Lwiyo ndotijane akwiya: tubala twa aufabetti, kusumpula mulaka ubelesegwa, kuzyiba mabala abelesegwa mumyaambo iindeneindene, kucizyiba kwaamba mabala mbaalembwa.

Nzyoyelede kusoleka kucita: kusungwaala, kubelekela antoomwe, kucizyiba kuyeeyela cintu mboticibe.

Bumbi mbokonzya kucita maciti aaya:

- Bamba na panga kaimbo kajatikizya tubala twa aufabetti.
- Kolomba umwi muntu kuti akugwasye kubamba na kupanga bbuku eeli.
- Belesya tubwe tusyoonto naanka tuvwunisyo twamabbodela kubamba na kupanga tubala twa aufabetti a tebule naanka ansi buyo.

Kuyaka bulambwa na Ng'anda ndamfwu

Zibelesyo ziyandika: Pepa liyumu na ma pulasitiki, tubbokesi tusyoonto, mabwe aselebete

Cakucita na zyakucita:

- Amubweze zintu zikonzya kukkala kabotu akuzibikka antoomwe. Eezi zilakonzya kuba zibbokesi zyakaindi, zibbokesi zijisi azijazyo, mabbuku, tubwe tusyoonto, zibbodela zyamapulasitiki kazijisi atusinshyo....
- Soleka kuyaka bulambwa na mayake malamfwu kubelesya zintu ziindeneindene zyomwabwezelela. Nchinzi ncomwabona kujatikizya zintu nzyomukonzya kubikka atala azyeenzinyina? Zili kuli zintu zipatipati? Ikuti na wabikka tuntu tusyoonto kensi aabulambwa mboyaka, ncinzi cinga cilacitika?
- Ukonzya kuyaka bulambwa bulamfwu buti? Ncinzi cipede kuti mayake aako atawi?



Musela: Bana baku Primary

Kugwasilizya kwa batapi/banabokwanu: Kusyoonto maningi

Lwiyo ndotijane akwiya: Kweelanyika, kweezeezya cakucita mumutwe

Nzyoyelede kusoleka kucita: Kusolekasoleka kucita cimwi, kusungwaala, kubelekela amwi, a kuziba zyelekelo

Bumbi mbokonzya kucita maciti aaya:

- Kobuzya umbi muntu kutegwa akugwasye kuyaka mayake na bulambwa bwako.
- Kuti na ulaamapenzi kubona kabotu belesya zintu nzyokonzya 'kujata amaanza' kuya bulambwa.

Yaka cisinkilila aindwa

Zibelesyo ziyandika: Zyuuno/matebule/malo, zintu zipati mbuli zibbokesi zyamapepa na zizwa kumasamu, mavwili akaindi, azimwi buyo

Cakucita na zyakucita:

- Cintu cisinkila akwiinda ncintu ncotukonzya kujata amaanza alimwi ncotukonzya kutanta atala na kwiinda munsi nanka kunjila buya mulincico. Inga cajatikizya kulunduka na kuzuza, kusotoka, kukalaba, kutantaaku kweelanyika. Ulakonzya kucita kuti cuubeube na cikatazye mbubonya mbuli mboyanda kuti cibe. Langa ngooyu mukozyanyo mucifwanikiso eci munsi.
- Jana busena (mukati na anze) mpokonzya kubamba na kuyaka zisinkilila aindwa. Langaula zintu na zibelesyo zyakuyaka cisinkilila aindwa: mukozyanyo, zintu zizwa kuzisamu na mapulanga, mabwe mapati kubamba akulyatila, mavwili akaindi amyoota, zyuuno na matebule akaindi. Kusaanguna amubuzye bapati na mulakonzya kuzibelesya eezi zintu zyakali zyamu ng'anda.



- Bamba akuyaka nzila ijisi zisinkilila. Koyeeya kuti weeleda kubalesya nzila isinkilidwe eeyi. Ibambe kuti nzila eyi iyumeyume pesi kutali itakonzeki kucita pe!
- Isoleke nzila yako ijisi zisinkilila – sena kuli ncoyanda kuti ucinse? Ambila muntu umbi kuti alange ‘ciindi’ ncokonzya kutola kutegwa ukonzye kwiinda munzila eyi isinkidwe. Ino inga ulakonzya buti kufwambaana kumanizya kwiinda munzila eeyi isinkilidwe?



Musela: Bana baku Primary

Kugwasilizya kwa batati/banabokwanu: Kwaakatikati

Lwiyo ndotijane akwiya: Kuyeeyle yaayela, kuyaka

Nzyoyelede kusoleka kucita: Kusungwaala, kumana mapenzi na makatazyo, kweendeleya kabotu zintu, kuziba bupati bwacimwi cintu


Bumbi mbokonzya kucita maciti aaya: Bamba nzila isinkilidwe mukuubauba kutegwa muntu ula buyumuyumu kweenda na buyumuyumu kubona acikonzye awalo. Sanganya zimwi zintu nzyobakonzya kucita batalangi abataboni, mbuli kubbulungana ansi, kukalaba nanka zintu ziyatwa nzyobakonzya kujata amaanza nobeenda munzila eyi ijisi zisinkila-sinkila azimwi buyo.

Cisolo cakusanganya-sanganya


Zibelesyo ziyandika: Zilembyo mbuli pensulo amapepa, nchoko

Cakucita na zyakucita:

- Wayanda inga walembulula tweengo ootu tujisi manamba a pepa, naanka kujana busena bupati mbokonzya kweenga ansi akubelesya twe na mulota naanka nchoko.




- Eeci cisobano na cisolo ncakusobana amanamba. Kuzwa kumatalikilo (START) weelete kweenda kucililizya tweengo kuyoosika kumamanino (FINISH). Inga weenda mukeengo katanyoninyoni naanka koyakunyonanyona naanka kutobeleyza kazila nkoobona kabotu.
- Ciindi notobeleyza tweengo weelete kuyabusanganya kubelesya manamba ngoinda na ngoindilila kutegwa ukonzye kujana namba yamamanino iili kumagolelo akeengo (FINISH).
- Mukozyanyo: Ninzila zyongaye ziindeneindene nzyokonzya kujana kutegwa upange namba 8?




1.

$$2 \times 4 = 8$$



2.

$$2 + 2 + 4 = 8$$



3.

$$3 \times 4 - 4 = 8$$

$$(12) - 4 = 8$$

Bwiinguzi: kuli nzila
buyo zyotatwe
nzyokonzya kubelesya

- Milawo njeeyi:
 - ⌚ Kufumbwa nzila njoobelesya yeelede kuti kayiindene
 - ⌚ Kwiina nzila yeelede kwiinda abusena bomwe kuziindi ziinda alicomwe.
 - ⌚ Kufumbwa ciindi waindilila namba iili akeengo weelede kusanganya, kugusya a/haanka kutaamuza kutegwa namba eeyo injilane mukusanganya-sanganya kwako.

- Sena inga waijana nzila ikutola kuti ujane namba 10? Sena inga wajana nzila zyobilo zikutola nkoyoojana namba 16? Kolemba mbuli mbocikonzya kwaajana ma ansa naanka bwiinguzi kumibuzyo eeyi.
- Ninzila nzi zimwi a manamba aakumamanino ngokonzya kubamba na kupanga? Ninamba nzi yiinda kukomena njokonzya kubamba na kupanga? Ninamba nzi yiinda kuceya njokonzya kubamba na kupanga? Aliyongaye manamba aindene aakumamanino na kumagolelo ngokonzya kubamba na kupanga antoomwe?

Kwiindilizya kucita maciti apedwe:

- Kopa umwi muntu namba yakumamanino akumubuzya kuti ajane nzila zitola kunamba yamamanino. Ndiza balajana nzila nzyootali kuyeeyela!
- Kobikka manamba aambi ngoyanda ala manamba alembedwe mutweengo mucifwanikiso cili atala. Kufumbwa manamba alakonzya kweelela pele ncibotu kubelesya manamba ayenda alike- naanka ayenda biyo obilo.
- Ndiza inga wabelesya manamba aajisi tudomwi kutegwa cisobana ciyumeyume. Mukozyanyo ngooyu, $0.5 \times 4 = 2$ nokuba/naanka $2.5 \times 5 = 12.5$

Musela: Misela yoonse

Kugwasilizya kwa batapi/banabokwanu: Kwaakatikati

Lwiyo ndotijane akwiiya: Kusanganya-sanganya, kusanganya, kugusya a kutaamuza.

Nzyoyelede kusoleka kucita: Kumana mapenzi na makatazyo, kuyeeya kwiindilide, kubelekelaamwi, kukwabana kabotu mumyaambo

Bumbi mbokonzya kucita maciti aaya: Kobamba na panga cisolo cipati ansi kubellesya nchoko na twe wamana weende kucililizya nzila ziikugwasye kuyeeya mbuli mbooli kusanganya kabotu. Manamba aaya kaatalikila buyo a 1 akutaindilila a 5 pe.

Kujika a myeelwe na manamba

Zibelesyo ziyandika: Zilembyo mbuli pensulo na pen a peeni, Zyakujika azyakujikila

Cakucita na zyakucita:

- Kolisalila eeco ncoyanda kuti ujike. Ezeezya zyakujika kwiinda mukugwasigwa amuntu mupati na mupati wako kuti na uyanda kujana lugwasyo.
- Lemba mundando na cipepa cha zyakujisya (zintu nzyoyanda kubelesya kujika) nzyotiyande kubelesya mukujika.
- Yeeyela akubamba kuti na mbantu bongaye mboyanda kujikila cilyo eeci. Ino nzinji buti zyakujika nzyotiyande kutegwa ujikile namba yabantu eyi? Lemba muulo wacakujika acimwi ncoolemba a pepa lyazyakulya.
- Ino muulo inga ulasika aali kuti na wayanda kujikila bantu bainda mubibili kunamba eeyo? Ino kuti mwayanda kujikila cisela ca namba njomwali kuyanda kujikila? Ino kuti mwayungizya bantu bobilo (2) atala a namba njomwali kuyanda kujikila?
- Bweza zyakujisya azyakujikila (mpoto na mpani) mukulibambila. Pima mweelwe wazyakujika nzyojisi.
- Amwaambaule mbuli ntaamu/malailile ngomutibweze kujatikizya zibelesyo na zyakujisya mwamana muzilembe apepa. Amubelesye mabala kusola kupandulula kujika mbuli 'kutendaula', 'kuyupa', 'kukopa' a 'kusanganya'.
- Tobeleyza ntaamu antaamu azyakujika a kubambilula bulembu mbolebede bujatikizya malailile akujika mboyabuya, soleka kutondezya kabotu-kabotu kutegwa umbi kacikonzya kutobeleyza ziyandika mukujika.
- Wamana buyo kujika kotamba na koita bamukwashi wako kuti bazoolye ncoojika
- Koyeeyela mboyelede kucaandaanya na kwaapaula cilyo ncoojika mumyeele yeelede kutegwa bantu boonse mboojikila balye akukkwana. Myuungo yongaye/na zipaanzi zyongaye/na nkunji buti aumwi muntu nkwayelede kupegwa? Sena cakulya eeci cilakkwana kutegwa kubule aubulila alimwi akukonzya kuliindulula kubweza cakulya na kaciyanda kulya?

Kwiindilizya kucita maciti apedwe:

- Lemba zyakulya ziyandika kuti muntu akonzye kutobeleyza malailile mbwayelede kucijika. Ambila bantu kuti babambe na kulemba zilyo zyelede bamana baambe (bakwaambile) na malailile alimaubauba kutobeleyza alimwi na kuli ceelede kucinca kuzintu zyakujisya ambozijikwa.



- Sala zyakujisya nzyonga wabikka muzipaanzi-paanzi kutegewa ubambe tubeelabeela kuzwa kulizyakujisya nzyojisi, mbuli tumbuwa na nkukisi nanka kutendaula mafuleenke kupanga ciloy ca micelo iligwa. Panga na bamba zipaanzi-paanzi zyacakulya a kuzilemba mbubonya mbuli mbokulembedwe mucifwanikiso cilia atala.
- Bamba akulemba mu 'bbuku lyazyakulya ambozijikwa' eezyo zyoonse zilyo nzyoyandisisya kapati.

Musela: Misela yoonse

Kugwasilizya kwa bapati/banabokwanu: Kwaakatikati / kuli mujulu kapati

Lwiiyo ndotijane akwiyya: Kubelesya manamba, kuzyiba kubelesya manamba, kupima, kubamba zyelede kujisya na zyakujisya

Nzyoyelede kusoleka kucita: Kusungwaala, kukwabana mumyaambo, kumana mapenzi na makatazyo, kuyeyya kwiindilide, kweendelezya kabotu zintu.

Bumbi mbokonzya kucita maciti aaya:


- Kolomba umwi muntu kuti akugwasye mboyelede kujika
- Kopa malailile kumulomo kutali kwaalemba buya apepa.
- Kolomba umwi muntu kuti alembe apepa malailile oonse
- Zekula na enga zifwanikiso zitondezya ntaamu antaamu yazyakujisya ambozijikwa

Kubamba cisobano acintu ciyumuuyumu

Zibelesyo ziyandika: Zilembyo na pensulo zyamisyobo-misyobo, pepa lipati, tuntu tusyoonto, kagele, inzukuunzuku na cisolo naanka cisolo cakabambwa amapepa.

Cakucita na zyakucita:

- Kobweza imapepa a pensulo mukulibambilila, zylembyo zyamisyobo-misyobo kuti kacikonzeka. Kobika ipepa lipati a tebule naanka ansi.
- Enga tubbokesi-bbokesi tujatene a pepa kutegwa ubambe 'kazila' na 'kakondo' a pepa pati (amubone kayi mucifwanikiso cili munsi). Kotondezya cakutonkomana imatalikilo amamanino.



- Utalembi nociba comwe mutubbokesi tunji aawa a cisobana ceengedwe buya acintu ciyumuuyumu. Mutusena twatubbokesi tumwi lemba kuti 'bweza kapepa'. Koyungizya tusena tusyoonto twalo tujosya munsi na tutola kumbele, kupa mukozyanyo, 'joka ntaamu zyobilo', 'cakwiinda lino/ acikusotoke lino.... Ncoyanda nkuti cisobano kacitali cuubauba alimwi kacikondeleya pele kacili cisobano muntu ncakonzya kucita kakutakwe abuyumuyumu kuti azunde bamwi.

- Kotendaula tubbokesi-bbokesi twatupepa. Kulubazu lumwi bwaka bbokesi kasyoonto akamwi kolemba malailile/maciti. Kocenjela alimwi soleka kuti ube amalailile aindeneindene asangene! Ngooyu mukozyanyo:
 - ↪ Bwini munamba: kubala mubutatu 3s, muciloba 6s, mulusele 8s ...
 - ↪ Micto ibonwa: zinguluka ziindi zyotatwe, umauma amutwe wako akuli zilazila ada kumwi kobala kuyoosika ku makumi obilo – 20.
 - ↪ Kobamba na panga mundando wa mabala alo aalimvwisya kukozyanya
 - ↪ Imba kaimbo na lwiimbo
 - ↪ Luzyibo Luzizilwe/luzibidwe: kowamba madolopo mapati muzyooko na masi ngozyi...
- Kamuli antoomwe ambomuzundana limwi amuzuminane imwi milawo iijatikizya cisobano cenu, mbuli kuzyiba kuti nguni usaanguna kweenda? Ncinzi ceelede kucitwa kuti umwi sikuzundana mumusobano ooyu wakakilwa kucita maciti apedwe mumusobano? Sena cilazumizigwa kulomba kugwasigwa? Sena inga walusalila kwaamba kuti cikwiinde na cikusotoke casika alinduwe? Mwamana kuzuminana milawo amusobane cisobano na cisolo eeci.
- Kobikka tupepa ‘twamaciti’ katulangide ansi munsimunsi a cisobano ceengedwe akapulanga. Aumwi sikuzundana na uuli mucisobano eeci asale kantu kasyoonto nkanooyenza-enzya akapulanga keengedwe cisobano. Aumwi sikuzundana ulijisi ciindi cakuwaala cisolo.
- Kuti na sikuzundana waimina aleembedwe kuti ‘kobweza kapepa’, bweza kapepa kamaciti. Kocita maciti aaleembedwe akapepa. Ikuti sikuzundana wakakilwa, amulange kumilawo njomwakabamba kutegwa muzyibe cakucita.
- Ooyo sikuzundana uusika kumamanino kwiinda bamwi nguazunda.

Musela: lusele (8) akwiinda

Kugwasilizya kwa batapi/banabokwanu: Kwaakatikati

Lwiyo ndotijane akwiya: Kusumpula mulaka ubelesyegwa; kubelesya manamba, luzyibo luzyiziyilwe

Nzyoyelede kusoleka kucita: Kukwabana mumyaambo, kubelekelaamwi, kuyeeya kwiindilide, kusungwaala.

Sena ulicibwene ncendibwene?

Zibelesyo ziyandika: Zilembyo mbuli pensulo a pepa lyakulembela.

Cakucita na zyakucita:

- Zekula na enga cifwanikiso.
- Ciccilila, lemba malailile ayiisya mbuli mbokonzya kuzekula na kweenga cifwanikiso.
- Ambila na lomba umwi muntu cuti accilile malailile aako kotamutondezi na katanacibona cifwanikiso cako.
- Mwamanizya, amwelanyike na mukozyanisyenye nzyomwazekula na kweenga. Muyeeya but anyzomwazekula na kweenga? Sena zilikozyenyenye na ziliindene? Ino nkaambo nzi ncoziindene? Ino ncinzi calikukonzya kupa cuti nyomwazekula na kweenga zilibonye kukozyanya?



Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiiya: Kusumpula mulaka ubelesegwa; kulemba malailile


Nzyoyelede kusoleka kucita: Kusungwaala, kweendelezya kabotu zintu; kukwabana kabotu mumyaambo

Zekula na enga munyama utanabwenwe ngoyeeya mumutwe wako

Zibelesyo ziyandika: Zyilembyo mbuli pensulo a pepa

Cakucita na zyakucita:

- Kobweza mapepa a pensulo mukulibambila, ndiza kakuli apensulo zyamisyobo-misyobo.
- Koyeeya buyo kuti ka kkiti nokalijisi moonono mbuli wa Muzovwu? Na mubwa kajisi cipapa mbuli ca nondo? Ino banyama aaba nobali kuboneka buti?
- Zekula na enga munyama uuli mumutwe wako utanabwenwe pe uuji azibeelebeela zyabanyama bambi. Ulembe mazina azibeelebeela zyabanyama bambi mboobelesya.
- Cipe zyina ndyoyanda cinyama ncoozekula na kweenga. Izina ndyoopa lilakonzya kutupa muzezo wazinyama zyabelesegwa mucifwanikiso camunyama wako.



Kwiindilizya kucita maciti apedwe:

- **Koyeeya buyo:** Ino cinyama cako eeci cikkala kuli (munyika ino na nyika buyo imbi? Ncinyama nzi?), Ino cinyama eeci cilya nzi, ino cinyama eeci cilila buti, Ino cinyama eeci ceenda buti? Ino zibeelebeela ziindeneindene zyabanyama bambi nzyocijisi cakazijana kuli na zyakazwa kuli?
- **Kwaamba/Kwaana caano na kaano kajatikizya munyama ooyu.**
- **Kobala caano na kaano katabela** (naanka kwaambilila umwi muntu kuti akubalile) kutegwaa ukonzye kujana mizeeo.

Suntwe a sulwe

Suntwe wakali kuuzya na kusambala cisyu kumushika pele Sulwe walo wakali kumuseka mweenzinyina akumufwubaazya. Yebo Suntwe tokonzyi kuzuza kwiinda ndime pe, sena ulakazya na? Sulwe wakabuzya cakunyansya mweenzinyina. Yebo wakacembaala alimwi tokonzyi akubona kabotu pe. Sulwe wakazyanazyana kumbele lya Suntwe walo wakasoleka kuti amujate pele wakakakilwa. Sulwe wakatija kumwi kaseka. Suntwe wakati 'ndiyakukutondezya bumwi buzuba'. Suntwe wakazumanana kulicengeezya mbuli kuti meso aakwe akaindila kutabona kabotu akatalika kusama magilazi asiya mbi. Sulwe wakaindila kubaanchiki akutayoowa. Wakatalika kusweena munsimunsi a Suntwe. Pele, bumwi buzuba Suntwe wakatandabika maulu ajisi mala malamfwu akujata Sulwe nkiali kumatwi. Takwe naakayanda kwaalekezya matwi a Sulwe pe. Wakatalika kulicengeezya kulya matwi a Sulwe. Sulwe wakapazaya akulidikimuna kuti Suntwe amuleke pele Suntwe wakaakwela mujulu ansi akwaaladamuna matwi limwi alampuluka pele Sulwe wakacikonya kusupuka kuzwa mumeno a Suntwe nikwainda kaindi kalamfwu (meno a Suntwe eci ciindi taakali kubosya kapati ka) akutija cakufwambaana kuzwa kumushika oyu, akuzwa mudolopo eeli, kutija Suntwe. Aano mazuba nkekaambo kaako ncomubona Sulwe ujisi matwi malamfwu.

Musela: Bana baku Primary

Kugwasilizya kwa bapati/banabokwanu: Kusyoonto maningi

Lwiyo ndotijane akwiyi: Zintu ziindeneindene bupange a mibala na misyobo-misyobo; mulaka wakukonzya kupandulula zintu

Nzyoyelede kusoleka kucita: Kusungwaala, kweendelezya kabotu zintu

Bumbi mbokonzya kucita maciti aaya:

- Pandulula munyama mbwabede. Kolailila umwi muntu kuti azekule na ayenge munyama ooyu.
- Belesya bulongo na idaka naanka zibbodela zyakaindi a zyakajisi zilyo kaindi kutegwa ubambe munyama ooyu.

Zekula na enga dolopo pati ndyoyeeyela buyo

Zibelesyo ziyandika: Mapepa a zyilembyo mbuli pensulo/ a pensulo zyamisyobo-misyobo

Cakucita na zyakucita:

- Kojana pepa pati a pensulo mukulibambila.
- Kolomba umwi muntu kuti akubalile cibalo ciccilila munsi oomu cakutabinda kutegwya yebo ucikonzye kujala meso ako a kuyeeya kabotu kabotu.
Jala meso ako akatalika kuyeeya dolopo lyako pati. Koyeeya kuti nduwe oyo uyakweenda mumugwagwa na kazila kali mudolopo pati eeli. Ino dolopo pati eeli lilibonya buti? Ino muli maanda na mayake aali buti mudolopo pati oomu? Ino maanda na mayake aali mudolopo pati oomu malamfwu buti? Ino mudolopo pati muli zyeendelo zilibuti zijanika? Sena kuli citishini cacitima mudolopo pati oomu? Sena dolopo pati eeli lilijsi masamu manji aasyangidwe kusola kukwabilila 'bube bwamuwo uunga'? Na ndi dolopo pati litondezya nyika mboiyakuba mazuba aazyaa kumbele kalijisi amyoota yuuluka? Kojana ciindi cikubwene kuyeeya mbuli dolopo lyako lipati mbolitibe.
- Kojula meso aako. Zekula na enga dolopo lyako pati. Koyeeylela maanda na mayake aako mpaatikkale azimwi buyo zyelede kweengwa. Kozekula na enga dolopo eeli moligolela wamana ubikke zyonse zyelede kujanika mudolopo oomu. Kobelesya zyilembyo na pensulo zyamisyobo-misyobo kuti na kozijisi/kaziliko.
- Ino eeli dolopo pati lyako ulalipa zyina nzi?
- Kolilanga dolopo lyako eeli alimwi. Sena kuli ncooluba kubikka? Sena waluba kubikka busena bwakukombela na cikombelo? Sena waluba kubikka busena bwamalende na bwakweebelala zyakaindi? Ndiza waluba kubikka mulonga abusena bwakusobanina? Sena inga bantu balakonzya kweendeenda kabotu-kabotu mudolopo pati eeli? Sena inga abantu bajisi bulema inga balacikonzya kweendeenda mudolopo oomu? Bona masimpe kuti dolopo lyako walikomezya kutegwya ucikonzye kubikka zintu na masena aali mbuli bwayaaya.



Musela: Bana baku Primary

Kugwasilizya kwa batati/banabokwanu: Kwaakatikati

Lwiyo ndotijane akwiya: Kusumpula mulaka ubelesyegwa; kweelanyika, mbuli madolop mbwaabeleka

Nzyoyelede kusoleka kucita: Kusungwaala, kuyeeya kabotu cakucita, kumana mapenzi na makatazyo.

Nzyoyandisisya

Zibelesyo ziyandika: Zyilembyo mbuli pensulo amapepa a misyobo-misyobe iindeneindene

Cakucita na zyakucita:

- Zekula na enga kutobeleyza minwe ili kumaanza apepa mpolili akati-kati.
- Acifwanikiso ncoozekula apepa, mukati aamunwe haacula lemba zyina lyamusyobo na mubala ngoyandisisya
- Minwe yacaala njoozekula na njoyenga, lemba zyina lyaciyo ncoyandisisya ncoiya kucikolo, cakulya na cilyo ncoyandisisya, cisobano ncoyandisisya, azyina lya munyama ngoyandisisya.
- Bamba busena bwacaala butalembewa kuti bubote kwiinda mukuzekula zifwanikiso zyazintu nzyoyandisisya!



Kwiindilizya kucita maciti apedwe:

- Koliyeeyela zintu ziindeneindene zyakulemba mweengedwe minwe, eezi inga kazili zimbi zintu nzyoyandisisya naanka mabala aambi mbuli madolopo mapati muzisi zimwi, zyakukkala mung'anda mbuli zyuuno, ndiza izintu nzyoyandisisya kucita a zimwi zinji buyo.



Musela: Bana baku Primary

Kugwasilizya kwa bapati/banabokwanu: Kusyoonto maningi

Lwiyo ndotijane akwiiya: Kusumpula mulaka ubelesegwa

Nzyoyelede kusoleka kucita: Kusungwaala, kweendelezya kabotu zintu

Bumbi mbokonzya kucita maciti aaya:

- Kolomba muntu umbi kuti azekule na ayenge kutobeleyza janza lyako
- Kwaambila umbi muntu zintu nzyoyandisisya
- Koyeeya alimwi zintu zimbi nzyoyandisisya nzyoyanda kuti zibikwe

Ibula bwaato bwako

Zibelesyo ziyandika: Bbavwu na bbakete lyakaindi litabeleki na bbodela, ipepa na cisani, mabwe

Cakucita na zyakucita:

- Amujane bbavwu na bbakete lyakaindi na bbodela lya pulasitiki
- Koyezyezya bwaato bwako, sena ulabikka cisani citondezya muwo abwaato?
- Koyibula bwaato bwako mu bbakete lijisi meenda nanka mukaziba ka meenda kasyoonto; Ino bwaato oobu bulaiybuka kabotu? Sena inga wacita kuti bwaato obu bweende atala meenda na maanzi?
- Bwezelela mabwe. Ino inga wabikka mabwe manji buti kusikila bwaato bwiinkile na bunjilwe meenda na maanzi?



Kwiindilizya kucita maciti apedwe: Sena ulakonzya kubamba na kupanga bwaato kubelesya zintu ziindeneindene? Mbuli kubelesya pepa...oyu mukozyanyo buyo? Sena eci inga chapa kuti bwaato bukonzye kubikkwa mabwe manji?

Musela: Bana baku Primary

Kugwasilizya kwa batati/banabokwanu: Kusyoonto maningi / kwaakatikati

Lwiiyo ndotijane akwiiya: Lwiiyo lwakulibonena ameso; mbuli zintu mbozilema akwiibuka mumeenda na maanzi


Nzyoyelede kusoleka kucita: Kusungwaala, kweendelezya kabotu zintu; kuyeeyela cimwi cintu mboticibe.

Kuya kumushika na kumaliketi

Zibelesyo ziyandika: Zintu 'zyakusambala' na 'kuuzya' abusena bwako mbosambalila, pensulo amapepa

Cakucita na zyakucita:

- Kojana kasena na busena bwakubambilia mushika. Inga kakali katebule naanka kasena ansi buyo abusena amwi.
- Koyeeya akusala ncoyanda kunoosambala amushika wako. Sena zyakulya? Zisani? Mabbuku? Naanka zintu zisangene?
- Kobwezelela zintu zyakubikka amushika wako. Kobuzya bapati naanka mupati wako kuti naa cilikabotu 'kukolota' zintu lutaanzi. Ulakonzya kubelesya mabwe, mabbatani, tuvwunisyo twamabbodela, matuvwu, tusamu, mbuli zintu 'zyakulicengeezya' kuti zilasambalwa na zyakusambala.
- Belesya mabwe naanka tuvwunisyo twamabbodela mbuli mali 'akucengeezya'. Jana kabbokesi kasyoonto kakuyobweda mali. Langaula akujana mapepa a pensulo mukulibambilia kutegwa uzyibe mboyelede kusambala zintu zyako.
- Kobamba busena bwa mushika wako. Koyala akubikka zintu zyako kabotu-kabotu. Kolemba myuulo atupepa akutubikka munsi-munsi azintu zisambalwa amushika wako.
- Kojula cintoolo cako wamana wiite bantu kuti banjile kuula zintu.
- Cita kuti cikondeleye kwiinda mukutajanika azintu zyoonse ziyanda bantu. Pele akujanike zintu nzyobatayandi bantu. Naanka kocita zintu kuti zidule akubaambilia bantu ncozidulila zintu. Sena bantu bazuminana anduwe kaambo nkoopa kujatikizya zintu mbozidula?



Musela: Bana baku Primary

Kugwasilizya kwa bapati/banabokwanu: Kwaakatikati

Lwiyo ndotijane akwiya: Kusanganya akugwisya akusanganya-sanganya kujosya myuulo, mulaka ubelesyegwa mumakwebo akuula akusambala

Nzyoyelede kusoleka kucita: Kukwabana kabetu mumyaambo, kukanana kabetu kutegwaa ujane cimwi, kubelekelaamwi, kusungwaala, kumana mapenzi na makatazyo

Ino ali ongaye mabala...?

Zibelesyo ziyandika: Zilembyo mbuli Pensulo amapepa

Cakucita na zyakucita:

- Lemba muzila wamabala 'Learning at home is fun'
- Bona masimpe kuti aliyongaye mabala aindeneindene ngokonzya kubamba kuzya kumuzila wamabala alaatala wamana ubambe mundando wamabala ngoobamba, mbuli mukozyanyo: *Learn, ring, mat, lama, night, girl, thing.*
- Sena ulakonzya kubamba muzila wamabala munyowana kuzwa kumundando wamabala ngoolibambilila akulemba?
- Koyeeya cakusinizya muzila umbi waandeene alimwi akubuzya bamwi bantu kuti aliyongaye mabala ngobakonzya kubamba balo.
- Langa muzila wamabala oyu uuli munsi uubelesya tubala tuli mu aufabeti: '*The quick brown fox jumps over the lazy dog.*'
- Sena inga wabamba muzila wamabala ubelesya tubala tusyoonto twa aufabeti tutabelesegwi-belesegwi? Mbili nkiinga g nanka h? Aliyongaye mabala ngokonzya kubamba kuzwa kumuzila wamabala wako munyowana?

Kwiindilizya kucita maciti apedwe:

- Bamba na panga musobano wamabala kubelesesyia mabala.
- Bamba na panga kaano kafwaafwi kubelesesyia mabala manyowana wamana waalembe apepa.

Musela: Misela yoonse

Kugwasilizya kwa batati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa; kulemba, kuciziba kwaamba mabala mbwaayeledede, mboilembwa kabotu mizila yamabala

Nzyoyelede kusoleka kucita: Bulondo mumicito, macililanwa mabotu, kusungwaala

Nindali musololi na muleli wacisi.....

Zibelesyo ziyandika: Pepa azilembyo mbuli pensulo

Cakucita na zyakucita:

- Koyezeezya kuti nooli musololi wacisi cako. Ncintu cakusaanguna nconga ulayanda kucinca? Ino inga ncinzi nconga ulayanda kucita kujatikizya zitobela eezi:
 - ⌚ Lwiiyo (mukozyanyo, zikolo abamaiyi)
 - ⌚ Zilengwaleza zituzungulukide (mukozyanyo, kukwabilila zilengwaleza)
 - ⌚ Bukwabilizi bwa Nseba (mukozyanyo, zibbadela, basilisi bamuzibbadela mbuli badokota aba nesi)
 - ⌚ Zyeendelo (mukozyanyo, mbuli bantu mbobeenda kuzwa abusena bomwe kuya kubusena bumbi)
- Sena kuli mabunga ongaye abantu ngoyanda kuti ugwasye? Ino mbaani bantu abo? Ino inga ulakonzya buti kubagwasya?
- Langa zilembedwe mucibbokesi cili munsi wamana ubikke mabbala ngoyeyela mumyaakwe yamizila yamabala.
- Sanganya na bikka mizila yamabala manji mbuli ngoyanda.
- Litondezye mbuli 'Muleli' na 'Musololi' wacisi kwiinda mukubala mizila yamabala aako cakupozomoka akutayoowayoowa.



Nindali musololi na muleli wa cisi... ndime (zyina lyako)

Nindali musololi na muleli wa (cisi cako), ninda
 ndamana ninda

Nikwali

Inga ndalesya

Nindakalesya na nokwatalikwe

Inga ndabona masimpe kuti

Ndamana ndime: _____

Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiyi: Kusumpula mulaka ubelesegwa, kwaambaula kabotu mulaka (citasungilizigwi buya)

Nzyoyelede kusoleka kucita: Kusungwaala, kuyeeya kwiindilide, kukwabana mumyaambo, kwaambaula kabotu akati kabantu.

Buzyabuzya na ambaula amuntu mupati

Zibelesyo ziyandika: Zilembyo mbuli pensulo amapepa

Cakucita na zyakucita:

- Koyeeya umwi muntu mupati uindene kubantu boonse ngoyeeya kuti ubuzyebuzye mukaambo kamwi. Ndiza ulakonzya kuba muntu umwi mumukwashi wako naanka mucooko na busena mokkala.
- Ino nchinzi cipede kuti ooyu muntu mupati kandeene abamwi bantu? Nchinzi ncoyanda kuti umubuzye mupati ooyu? Sena cijatikizya mazuba akubwana bwabo? Sena nkucinca kwazintu nzyobakabona mubuumi bwabo? Sena nzintu zyakabacitikila mubuumi bwabo?
- Lemba mibuzyo apepa yoonse njoyanda kut ubabuzye. Langa-langa mibuzyo eeyi wamana wiipe manamba mbuli mboyanda kuti icililane kubuzigwa.
- ‘Kosoleka’ mbuli mboyoobuzya mibuzyo eeyi kwiinda mukwiibusya umwi muntu mupati naanka mupati wako. Eeci inga cakugwasya kubona na kuli mibuzyo yeelede kucincwa. Sena walikubuzigwa waibona buti mibuzyo eeyi? Yali mibuzyo mibotu na miyumu kapati?
- Sena mibuzyo eeyi yalikuyandika kupa ciindi cinji kutegwa muntu akonzye kwivwiila kabotu akwaamba kunji?
- Kobambilula mibuzyo eeyi mpoyeeya kuti yeelede kucinca noomana kusoleka kubuzya umwi muntu naanka mupati wako. Sena uyandika kuyungizya mibuzyo atala amibuzyo njojisi? Na kugusya? Sena kuli mibuzyo njoyanda kuti ucince?
- Lino koya ambele akubuzya muntu weelete. Wamana ubalumbe mbooli kubuzya-buzya kukupa ciindi cakuti ubabuzye mibuzyo.

Kwiindilizya kucita maciti apedwe: Lemba apepa mibuzyo njoyanda kubuzya-buzya mbuli bulembo buyanda kubalwa muluwaille naanka buyoolembwa mumuteende wamucilawo na busena mokkala.



Musela: Myaka lusele (8) akwiindilila

Kugwasilizya kwa batapi/banabokwanu: Kusyoonto maningi

Lwiiyo ndotijane akwiiya: Kusumpula mulaka ubelesyegwa; kwiiya kujatikizya mikwashi naanka tunsiyansiya twabusena mokkala.

Nzyoylede kusoleka kucita: Kukwabana kabotu mumyaambo, kubamba kuti zintu zicitike kabotu a kubamba kubuzyabuzya bantu, kuyeeya kwiindilide **Bumbi mbokonzya kucita maciti aaya:**

- Kolomba muntu umwi kuti akubuzye-buzye lutaanzi kutegwa uzibe ncoyelede kubuzya bamwi
- Lemba mibuzyo yakubuzya-buzya mumabala mapati kutegwa kaalibonya kabotu kaatakwe abuyumuyumu
- Bamba na lemba mibuzyo mubufwaafwi kutegwa kacili cuubauba kwiyeeya
- Komuyeeyzya uubuzigwa mibuzyo kuti awalo kavviila mukufwiinshya kutegwa kacili cuubauba kulemba bwiinguzi bwakwe apepa.

Kulipangila chibelesyo (chibelesyo na munchini)

Zibelesyo ziyandika: Zilembyo mbuli pensulo a pepa lyakulembela

Cakucita na zyakucita:

- Yeeya kujatikizya zyibelesyo (cibelesyo na munchini) nzyoyanda kuti ubambe na kupanga. Munchini ooyo ubeleka mulimo nzi? Ndiza munchini ukonzya kugwasya bantu? Sena ulakonzya kweenda amunchini ooyu? Ino munchini ooyu ubambilidwe na ukupangidwe kubelesya anzi? Sena munchini ooyu ubelesya malaiti?
- Zekula na enga cifwanikiso cacibelesyo na munchini wako wamana uzibandauke na kulemba zibelabeela zya munchini ooyu. Ino zibelabeela zya munchini zibelesya nzi?
- Lemba bulembu kujatikizya chibelesyo na munchini wako. Sena inga waupandulula mbuli mboubeleka? Nchinzi ncokonzya kucita a munchini wako?

Kwiindilizya kucita maciti apedwe:

- Bamba na panga chibelesyo na munchini wako kubelesya zintu zyitabeleki zyakasowegwa. Jana zibbokesi a zibbodela zyakaindi kupa buyo mukozyanyo. Lemba kujatikizya zibelabeela ziindeneindene zili a chibelesyo ecci na munchini ooyu kuti koyanda kucita boobu.
- Bamba na panga makwebo na kulisambala kwa chibelesyo na munchini wako. Ino masena nzi ngokozya kusambalila munchini wako? Chibelesyo eci na munchini ooyu ubeleka mulimo nzi utipe kuti bantu bauule? Ino munchini ooyu inga ulakonzya buti kusumpula maumi abantu kutegwabote? Maliinzi mbouulwa munchini ooyu? Lemba makwebo na kulisambala kwa chibelesyo ecci na munchini ooyu mumuteende wamu cooko momubede.



Musela: Bana baku Primary

Kugwasilizya kwa bapati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesegwa; kulemba, kwaamba mabala mbwaalembwa

Nzyoyelede kusoleka kucita: Kusungwaala, kumana mapenzi na makatazyo, kuyeeya kwiindilide, kukwabana mumyaambo, kuzyiba cintu acimwi busena mbociyanda na buceelede.

Kubumba kubelesya zintu zisowedwe

Zibelesyo ziyandika: Zilembyo mbuli pensulo amapepa

Cakucita na zyakucita:

- Bwezelela zintu zisowedwe zyakalikubikkide cimwi ciindi. Eezi inga kazili zintu zyakabeleka kale mbuli mabbodela amapulasitiki, tuvwunisyo twamabbodela, zibbokesi zyamapepa ziindeneindene kukomena na kuceya, zibikkilo, tusanisani twakaindi azimwi buyo.
- Alimwi kolangaula zilengwaleza nzyokonzya kubelesya mukubumba kwako kwazintu zisowedwe, mukozyanyo mbuli tusamu tusyoonto, mabwe, matuvwu akayuma, naanka bulongo na daka.
- Koyeeya eeco ncoyanda kuti upange na ubambe. Sena ncakusobanya mbuli moota na cidooli? Sena cilijisi mavwili? Naanka cilijisi bwina mocikkala? Sena cilijisi bwaanda? Koyeeya buyo mumizeezo yako eeco cintu ncoyanda kupanga na kubamba.



Njeeyi mizeezo ipedwe
kukugwasilizya:

- Zekula na enga cifwanikiso
cacintu ncoyeeya mumuzeezo
akutalika kuyeeya ziyandika
kubamba na kupanga cintu eeci.
- Lemba na enga mboticilibonye
- Kolanga abulembo na cifwanikiso
alimwi. Mbubuti mbokonzya
kusumpula mboticilibonye
ncoyanda kupanga? Ncinzi
cinga capa kuti cibumbwa cako
ciyumeyume? Ncinzi cinga capa
kuti cikonzye kweenda kabotu?



Musela: Bana baku Primary

Kugwasilizya kwa bapati/banabokwanu: Kusyoonto maningi

Lwiiyo ndotijane akwiya: Kuyeeyela cimwi cintu mumuzeezo, zibulo
mbozibeleka, kuyaka kusumpukide

Nzyoyelede kusoleka kucita: Kusungwaala, kumana mapenzi na makatazyo,
kweendelezya kabotu zintu, kucizyiba acimwi cintu busena mbociyanda

Bumbi mbokonzya kucita maciti aaya:

- Kolomba umwi muntu kuti akugwasye kubamba na kupanga cibumbwa cako.
- Kopa malailile kwiinda mukwaambaula buya kutegwa upange cibumbwa
cako wamana ulombe umwi muntu kuti akupangile cibumbwa eeci.
- Bulembo mboticilibonye kabuli buubauba kutobeleyza – bamba nongo
yakusyangila kasamu/kasyango, ndiza cintu cikonzya kulyeendela
colikke, ndiza cisolo ciyiisya kubala.

Kulemba mundando wazintu nzyoyanda

Zibelesyo ziyandika: Zyilembyo mbuli pensulo amapepa


Cakucita na zyakucita:

- Yeeyela zintu zimwi nzyokonzya kupangila mundando mbuli:
 - ⌚ Nyimbo nzyoyandisya
 - ⌚ Zisyango na zisamu mubusena mokkala
 - ⌚ Zintu zikukkomanisya
 - ⌚ Zintu nzyocizyi kucita kabotu
 - ⌚ Zintu nzyoyandisya kuti kaziliko mumukwasyi wako

- Soleka kuyeeya zintu zyotakonzyi kujata zyakulemba amundando oyu mbuli 'zintu nzyolumba kuti zyaakucitikila mu buumi bwako' naanka 'zintu zyalo zikubotela na zyikondelezya kucita'.

- Sala comwe akati kazyobilo wamana ulembe mundando ooyu apepa.

- Sena ulakonzya kwandaanya mundando wazintu ooyu kuubikka mutundando tusyoonto-syoonto? Kupa buyo mukozyanyo, zyisyango na masamu mubusena mokkala alakonzya kwaandaanizigwa kubikkwa muzibeela zya masamu aajisi micelo iligwa ayaayo aajisi micelo italigwi.



Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiyya: Kusumpula mulaka ubelesyegwa; kulemba kabotu, kwaamba akulemba kabotu mabala mbwaabede.

Nzyoyelede kusoleka kucita: bulondo, kubikka zintu mbozicililana, kusungwaala.

Bamba maapu na munyinza wabusena mbokkala

Zibelesyo ziyandika: Zilembyo mbuli pensulo a pepa lyakulembela, zilyo zyitana jikwa, zyakujikila mbuli mpoto, mpani amyuungo.

Cakucita na zyakucita:

- Libambe akubweza mapepa a pensulo, ndiza mapepa na mapensulo amisyobomisyobo.
- Kobweza lweendo, wendeende kuzinguluka busena mbokkala. Ino ncinzi ncoobona? (Maanda, mayake na maanda manji a migwagwa pesi amasamu na masena azibidwe kapati mbuli zikombelo na masena aakusobanina)
- Koyeeya buyo mbuli migwagwa imwi mokkala mboili milamfwu, mbuli masamu amwi amaanda na mayake amwi mbaali malamfwu. Ino mbuti amwi masena atakwe ciyakidwe asyokwe mbolili lipati? Mishika na masena akusambalila? Zikolo mbuti mbozili zipati? Ndiza azimwi buyo zintu nzyokonzya kubona akuyeeyela mbozili zipati?
- Bamba muzeezo mbuli mboyanda kweenga na kuzekula maapu na busena mbokkala. Sena ulabelesya misyobo iindene kutondezya zintu ziindene? Sena ulabelesya zitondeezyo ziiminina zintu ziindene (mbuli keengo kapilingene kwiiminina kalonga, keengo kanyanzabili kwiiminina cisamu,) na kweenga na kuzekula mbubonya mbuli zintu mbozilibonya?
- Ino pepa ndyoyanda kulembela na kweenga maapu ndipati buti? Sena ndipepa lyomwe? Na Obilo?
- Ino nzyoyanda kubikka apepa eli zyelede kuba zipati buti na zisyoonto buti? Mbuli cikolo, busena bwakusobanina, migwagwa na tuzila tusyoonto? Mbuli mushika na busena bwakusambalila?
- Lemba na enga na zekula maapu na busena mbokkala. Waalembe mazina masena aazintu nzyoobikka a maapu eyi naanka kubikka zitondeezyo zyipandulula masena abikwa a maapu akuzilemba kabotukabotu.



Kwiindilizya kucita maciti apedwe:

- **Koyezeezya:** muntu mweenzu mubusena kabuzya kumutondezya mbwakonzya kweenda kuya kumushika na busena busambalilwa naanka kusika kumulonga. Lemba naanka mwaambile mbwayelede kweenda kusika nkwaya. Jana muntu umwi kutegwa alange a maapu amana abuzye mbwayelede kweenda.
- **Kwaamba/Lemba kaano** kajatikizya bumwi busena ooko nkomukkala. Ino cikolo cakayakwa na kutilika lili? Sena kuzwa mazuba akaindi busena bwakusobanina bwakaliko? Sena kuli ciindi nokwakali tuyoba na muuwo mupati wakacitikide mubusena mbokkala? Mbuti sena kuli ciyanza na cizyano cipati cakacitika kale mubusena omo? Sena kuli tunsiyansiya tupati twakacitika kale? Sena kuli caano cijatikizya zyeelo caambaulwa mubusena mbokkala?
- **Panga na bamba cibumbwa** na mukozyanyo wabusena mbokkala. Belesya zintu zyakaindi zyisowedwe naanka tubbokesi tusyoonto ntokonzya kujana mubusena mokkala. Sena ulakonzya kupanga cibumwa cabusena bwako kutegwa olo muntu uutalangi akonzye kubelesya maanza akuziba mbwayelede kweenda kusika kubusena mbwayandaula? Kubelesya tutambo inga ndiza akwalo kwagwasya.

Musela: Misela yoonse

Kugwasilizya kwa batapi/banabokwanu: Kwaakatikati / kupati maningi

Lwiyo ndotijane akwiyya: Kusumpula mulaka ubelesegwa; mabbala apandulula masena; mabala abelesegwa kulailila muntu mbwayelede kweenda; busena mbotukkala, masena mapatipati mucooko.

Nzyoyelede kusoleka kucita: Kusungwaala, kweendelezya kabotu zintu, kweenga kweendelanya azintu mbozili zipati na zisyoonto, kwiiminina na kutondezya cintu mbubwenya mbocibede, kulanganya busena acimwi cintu mboceelede, kulangisisya akubona zintu mbozibede.

Bumbi mbokonzya kucita maciti aaya:

- Pandulula na zubulula busena wamana ubuzye umwi muntu kuti akugwasye kweenga na kuzekula maapu naanka busena mbokkala
- Bamba na panga cibumbwa (kutali kweenga buyo maapu) cabusena mbokkala
- Bamba na enga bubambe bwa ng'anda njokkala naanka kaanda komwe kajanika mukati kang'anda mpati
- Kwaamba twaano tujatikizya kasena nkokkala akwaambila umbi muntu kuti alembe twaano apepa.

Kusuma cidooli caambaula kubelesya sookesi

Zibelesyo ziyandika: Sookesi lyakaindi pesi kalitajisi dooti, zilembyo zilaabulembo bupati zili mbuli pensulo naanka nchoko, ma bbatani akaindi, nyeleti, ntali akagele, ntali ya wuulu

Cakucita na zyakucita:

- Langaula na jana sookesi lyakaindi lilamfwu. Bikka janza lyako mukati a kupanga cilibonya mbuli kabala ka C kubelesya minwe yone amunwe syaacala. Kobikka munwe syaacala akkalila kasindi musokesi. Sobanya-sobanya minwe eeyi kusikila limwi kulibonye mbuli kuti mutwe uujisi mulomo.
- Belesya zilembyo mbuli pensulo na nchoko kutondezya aatikkalile meso. Samununa sookesi kukwaanza. Zekula na enga meso obilo naanka kusuma ma bbatani abusena mpooenga kuti meso akkalile mpawo.
- Lino suma wuulu kutegwa ubambe cilibonya mbuli masusu. Kubamba masusu weelede kutendulula wuulu kwiibamba kuti yeelane wamana uyaange akatikati kameso. Mpoonya kosuma wuulu a sookesi, atalatala a meso mpakkede.
- Lino bikka tubotubotu kutegwa cidooli ca sookesi cibote. Cisumine akucisamika kasooti cidooli naanka kupanga mulomo kubelesya cipepa ciyumu naanka kasani.
- Cipe zyina cidooli cako ca sookesi wamana utalike kuliiya na kusoleka kubelesya cidooli ca sookesi 'kwaambaula'. Kocipanga kuti cilibonye Kubota naanka kacinyemedé kweendelanya ambobelesya na kunyanyansya minwe yako na janza lyako. Inga wacita kuti cilibonye kugambwa kwiinda mukutantaanya meso acidooli naanka kucitondezya kuti canyema kwiinda mukuswenzya meso munsimunsi antoomwe.

Kwiindilizya kucita maciti apedwe: Kobamba na panga cimbi cidooli ca sookesi wamana ucite kuti zidooli zitalike 'kwaambauzyanya'. Ino acimwi cilibonya buti nocaambaula? Ino acimwi ciyanda kutondezya luzyibo nzi nocaambaula? Kopa mukwasyi wako maebeebe azidooli zyamasookesi nkozyaambaula.



Musela: Bana baku Primary

Kugwasilizya kwa batati/banabokwanu: Kwaakatikati

Lwiyo ndotijane akwiya: Kuzekula na kweenga, kwaambauzyanya, kusumpula mulaka ubelesyegwa.

Nzyoyelede kusoleka kucita: Kweendelezya kabotu zintu, kusungwaala, kujana nzila anyina nzila

Cisolo na cisobano cakubalila

Zibelesyo ziyandika: Zilembyo mbuli Pensulo amapepa

Cakucita na zyakucita:

- Ino kuli zisolo na zyisobano nzi nzyomusobana mucisi canu? Sena mujisi zisolo na zisobano nzi zibelesya tubwe tusyoonto, nseke zyabunyangu zyakayuma, nseke buyo naanka kufwumbwa zikonzya kubelesegwa kubalila a cipulanga ciyumuyumu (cikozyenye aceeci cifwanikiso cilibonya munsi oomu)?
- Mbubuti mbocisobanwa cisolo na cisobano eeci? Sena uliizyi milawo ya cisolo na cisobano eeci? Na tamwiizyi milawo, sena mulakonzya kujana umwi muntu ukonzya kumuiisya?
- Na tamujisi 'cipulanga' na 'cisenke' ciyumuyumu, sena inga mwalipangila na kulibambila aakusobanina cisolo mbuli ansi anyika na mumavwu? Mulakonzya kubamba na kusya 'tulindi' tusyoonto munyika na mumavwu mwamana mubwezelele tubwe tusyoonto twakubelesya.
- Amusobane cisolo na cisobano eeci. Kuti na cisolo eeci ciyanda bantu bobilo kuti cisobanwe mweelede kujana umbi muntu ngomutisobane anguwe. Ncinzyi cipa kuti cisolo na cisobano eeci kacili cisobano cibotu? Ino mbunkutwe nzi mboyelede kusoleka kucita bulibonya?





Kwiindilizya kucita maciti apedwe:

- Sena ulakonzya kulemba malailile aajatikizya mbuli cisolo na cisobano cako mbocisobanwa? Koyeeya kuti malailile aaya apegwa kumuntu utana cisobanide cisolo na cisobano eeci.
- Sena ulakonzya kubamba cimbi cisolo na cisobano cakubalila? Koyiisyia umwi muntu cisolo na cisobano eeci. Ino milawo nzi yeendelezya cisolo na cisobano cinyowana eeci?

Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiyi: Kusanganyasanganya, kusumpula mulaka ubelesyegwa (malailile)

Nzyoyelede kusoleka kucita: Kubelekelaamwi, kumana mapenzi na makatazyo, kukwabana kabotu mumyaambo

Kweebela Zilengwaleza

Zibelesyo ziyandika: Zilembyo mbuli pensulo amapepa

Cakucita na zyakucita:

- Koya anze wamana usale eeco ncoyanda kuti weebele na ulange. Ndiza cilakonzya kuba cuuka mbuli silubilila uuyaka luubilila naanka kanyenyeeene kabwezedé cakulya kumulomo wankako. Ndiza inga caba cuuka cuuluka mbuli nkonkolekwa, na kayuni naanka nzuki ibwezelelela mulolo ulweelwa mu malubaluba. Ndiza ulakonzya kweebela masamu azimvwule ziwida mumuwo naanka mumuni uwida atala ameenda na maanzi mukalonga.
- Kkala weebele kwatuvwaluvwalu tusika ku kkumi atosanwe (15) naanka kwiinda waawo kumwi kolangisisya zyoonse zyicitika. Kolangisisya mbuli mboceenda, sena kuli tweengo na misyobo-misyobo iitonkomene, (misyobo-misyobo imweka-mweka naanka misyobo iikozyenye azintu zicizungulukide). Sena ulakonzya kucipandulula mbocibede?
- Kolibuzya mibuzyo imbi: Ino ncipati buti nceebona? Ino cijisi maulu ongaye? Ino ceenda buti? (kufwambaana, asyoonto-syoonto, kuzelengana, kabotu-kabotu). Ino ncoobona ciya kuli? Ino ncinzi cicisinkila mpociyanda kwiinda, ino ncinzi ncocisola kucita na kubamba? Sena kuli zyuuka/zinyama zikozyenye ancoobona munsi-munsi? Ino ncinzi ncozicita?





Kwiindilizya kucita maciti apedwe:

- **Zekula na enga** cifwanikiso cijatikizya cintu ncoyebela na ncolangisisya.
- Kolangaula twaambo tunji tujatikizya zintu nzyoobona. Kobuzya umwi muntu uuzyi kunji kujatikizya zintu eezi akuyeeya mibuzyo njotimubuzye. Ino cuuka/cinyama eeci cilya nzi? Ino zyuuka/zinyama eezi zili mumisyobo yongaye? Ino zicikonzya buti kujana cakulya? Sena zikkala mutubunga naanka zyolikke? Ino zizyala buti bana? Sena zyuuka/zinyama eezi zileenda misinzo mwaka amwaka?
- **Kobamba na panga bulembo bwa zilengwaleza.** Oobu bulembu bulakonzya kuba kapepa nkolembela naanka kuzekula na kweenga zintu nzyobona buzuba abuzuba. Kuti na koyebela na kubona cintu nciconya kwamazuba manji (mbuli zimvwule na minziinzimwa ya zisamu nzyozipanga naanka lubaluba likomena naanka kalonga, wamana ulangilile kwamazuba aindeneindene kuti na kuli kucinca kutibe.



Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa; mulaka upandulula cintu mbocibede, lwiyo lubonwa ameso, zilengwaleza alwiyo lwazintu zibonwa ameso.

Nzyoyelede kusoleka kucita: Kulangisisya kabotu-kabotu a caafwaafwi. Kwiya kujatikizya zintu nzyoyebela. Busicamba, kuyeeya kwiindilide, kukwabana kabotu mumyaambo.

Bumbi mbokonzya kucita maciti aaya: Kuti na kotakonzyi kubona kabotu, belesya nzila zimbi (kutali buyo meso na kubona) kutegwa ukonzye kuzyiba zilengwaleza. Swiilila, nunkizya akujata zilimunyika, masamu atusyango tusyoonto tujanika mpobede. Pandulula eeco ncoonunkizya, ncoomvwa a ncoojata amaanza. Ambila umwi muntu umbi mbuli mbocibede kutegwa walo alembe apepa ncoamba.

Lwiimbo lupyā, mujwi lyakaindi

Zibelesyo ziyandika: taakwe pe

Cakucita na zyakucita:

- Koyeeya kaimbo bantu boonse nkobazyi alimwi katakatazyi kwiimba.
- Bamba na kopanga mabala manyowana ajatikizya lwiimbo ndulwena oolu. Ulakonzya kubamba kaimbo na lwiimbo lwaamba kufwumbwa ncoyanda, kupa mukozyanyo, mbokumba meno aako, muntu uuli mucaano ngoyandisisya, naanka cintu cikondelezya na cibotu cakakucitikila.
- Koyiisya bamwi kaimbo na lwiimbo. Kosanganya azitondezyo zижатикизя lwiimbo kuti na koyanda.
- Ngooyu mukozyanyo wa lwiimbo lwaamba kuti '**Samba kumaanza ako kutegwa utacisiwi Korona**' kubelesya ijwi lyakaanzwa kaimbo kaamba kuti 'Kamba! Kamba! Maanza aako!'. Sena ulakonzya kulwiimba lwiimbo oolu?

Kamba! Kamba! Maanza aako! (x3)
 Jesu ulaboola alimwi!
 Samba! Samba! Kumaanza ako (x3)
 Utacisiwi Korona!
 Vwumba! Vwumba! Kumulomo wako (x3)
 Akakokola kavwungidwe!
 Tantamuka ali bantu banji (x3)
 Tokociswa Korona pe!



Musela: Bana baku Primary

Kugwasilizya kwa batati/banabokwanu: Kusyoonto maningi

Lwiijo ndotijane akwiiya: Kusumpula mulaka ubelesegwa, mudinkilwa wa lwiimbo, mabala mbwaendelana, mabala mbwaakozanya kwa amba.

Nzyoyelede kusoleka kucita: Kukwabana kabotu mumyaambo, kusungwaala.

Kweema kutaambi cintu cilimvwisy (Kutabujuli akubujula)

Zibelesyo ziyandika: Zilembyo mbuli pensulo amapepa

Cakucita na zyakucita:

- Kolanga kweema kobilo kупедве 'kutaambi cintu cilimvwisy' (cakulipangila buyo) munsi oomu. Komwe kuli mucikuwa kwakeemwa asikweema **Spike Milligan** akumbi kweema kuli mu Chitonga. Ulakonzya kubala cakuumuna naanka kubala cakupozomoka kuti koyanda. Langisisya twaambo tulembedwe twabufwubafwuba naanka mabala atayeeylewi kwaambwa.

On The Ning Nang Nong

On the Ning Nang Nong
Where the Cows go Bong!
and the monkeys all say BOO!
There's a Nong Nang Nin
Where the trees go Ping!
And the tea pots jibber jabber joo.
On the Nong Ning Nang
All the mice go Clang
And you just can't catch 'em when they do!
So its Ning Nang Nong
Cows go Bong!
Nong Nang Ning
Trees go Ping
Nong Ning Nang
The mice go Clang
What a noisy place to belong
is the Ning Nang Ning Nang Nong!!

Ati Nzi?

Basa yo! Yoo yoo!
 Banyoko ngwani? Ni mpetukwa
 Mpetu nzi? Mpeetu kabalo
 Kabalo nzi? Kabalo mweene
 Mweene nzi? Mweene hiinde
 Hiinde nzi? Hiinde kaapa
 Kaapa nzi? Kaapa maawu
 Maawu nzi? Maawu ntaanga
 Ntaanga nzi? Ntaanga bulukutulukutu ntee!
 Mwakali kwani? Twakali ko swayi
 Nimwatatweetela? Twaitume kalombe kozooilya munzila
 Kamuseka wee! Heheheee!
 Museka nzi? Tuseka Sikoswe
 Watyani? Walidabbankanya
 Nimwatamuzinta? Tumuzinte abe mujwa akwesu!
 Syaka Suntwe nguwaitimujaye, ntee!

- Wamana kubala kweema ooku, lemba mundando wamabala na oonse **mabala ataambi cintu cilimvwisy**a aayo sikweema Spike Milligan ngaakabelesya mukweema ooku.
 - Ino ndibbala nzi ndyooyandisisya litaambi cintu cilimvwisy alimwi nkaambo nzi ncoliyandisisya?
 - Sena ula kweema kujisi mabala atabujuli na ataambi cintu cilimvwisy mucisi cako/mumulaka wako ngobelesya kwaambaula?
 - Lembu bupanduluzi (ncolyaamba) bwa mabala ali atala alo akonzya kufwubaazya beenzinyoko.
 - Lembu mabala muzibaaka akulipangila omwini kusola kupandulula zicitika/mbozilimvwisy:
- ⊕ Muwo mumasamu.
- ⊕ Munzunzumina wa mala akuminwe abboodi:
- ⊕: mbuli mbwaalibonya mazyu a kayuni ciindi naawida mukazila.

- Kolipanga mabala manyowana aasika kuli osanwe aajisi bupanduluzi bwako omwini.
- Lino kolemba kweema kutaambi cintu cilimvwisya na kweema kutabujuli akubujula kubelesya amwi mabala ataambi cintu cilimvwisya ngoobamba. Inga ndiza tokooabelesya oonse mabala. Sala aayo ngoyandisisya ayaaya alimvwisya kabotu waabikka antoomwe..
- Inga wabelesya 'Alo a Ningi Nanga Nongo' kusola kukusungwaazy. Kosoleka katalika mizila yamabala ako atubala, tuli mbuli tootu:
 - Ⓐ Alya a ...
 - Ⓐ Alo a ...
 - Ⓐ Alimwi a ...
 - Ⓐ Oonse a...



Musela: Bana bamisela iisika ku lusele (8+)

Kugwasilizya kwa bapati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa, Bupanduluzi bwa mabala, twaambo mbotulembwa na kwaambwa kabotu, mbwaakozyenye akulimvwisya mabala twaambaula.

Nzyoylede kusoleka kucita: Kusungwaala, kukwabana kabotu mumyaambo, kusola kujana bupanduluzi bweelede

Bumbi mbokonzya kucita maciti aaya:

- Ambaula buya kweemba kwako naanka ulombe umwi muntu kuti akulembele kweema ooku.
- Lemba kweema kwamizila yobilo (2)


Shanga nseke akwiilangilila mboikomena

Zibelesyo ziyandika: Nseke, bulongo na mavwu, meenda na maanzi, kasamu cakupimya

Cakucita na zyakucita:

- Sala eeco ncoyanda kuti usyange na ukomezye. Nseke yabunyangu, cisyu naanka nseke buyo zimwi? Sena uyanda kusyanga cisyango ciligwa? Kobuzyabuzya kubantu nseke na zyisyango zikomena kabotu aciindi camwaaka ecino alimwi kuti ninseke nzi zijanika cino ciindi.
- Kosala mpoyanda kuti usyangile nseke yako. Ndiza mukagabba naanka anyika buyo mumavwu na bulongo? Ino kuti toosyangila munyika na mumavwu, sala busena bukwabilidwe alimwi butakonzyi kunyonganizygwa abanyama. Kolanga-langa ujane busena bwakusyangila kasamu kako. Sena muubusena buvwumbilidwe? Busena bujisi zimvule na zuba mpolibala loko?
- Kosyanga nseke yako abusena butajisi nsaku na lusyanga. Syanga zyobilo na zyotatwe nseke zyamusyobo omwe mubusena bomwe kutegwa kuti na yomwe tiiyamena (kukomena) zimwi zilamena. Kotilaila nseke yako kabotu-kabotu.
- Lemba bulembo bwakasyango kako. Lemba zyina lya kasyango kako akasamu kajisilizi bulembo akukasimpa mubulongo munsi-munsi anseke njoosyanga.
- Kotilaila nseke na cisyango cako buzuba abuzuba kutegwa bulongo kabuli butete na kabulaa mudumo lyoonse.

Kwiindilizya kucita maciti apedwe: Buzuba abuzuba kolangilila mbuli cisyango mbocikomena. Lemba akuyobola bulembo mbuli mbokaya bukomena kasyango. Kapime mbokalampa kasyango buzuba abuzuba kuzwa nikakamena. Kwainda mazuba ongaye kusikila nokatunga tuvvu lyakusaanguna? Ino kutegwa kulibonye duba na maluba akusaanguna? Ino kutegwa kazyale mucelo? Kolemba kufwumbwa eeco ncobona buzuba abuzuba.



Musela: Misela yoonse

Kugwasilizya kwa batati/banabokwanu: Kusyoonto maningi

Lwiiyo ndotijane akwiya: Kulima cakulya, zilengwaleza munyika,
kubambilila cisyangano na kasamu

Nzyoyelede kusoleka kucita: Kulangisisya zintu, kumana twaambo na
makatazyo

Kubala antoomwe

Zibelesyo ziyandika: Ibbuku lya twaano naanka ubelesye kaano kali akati katwaano tujanwa apepa litobela

Cakucita na zyakucita:

- Mwanaakwabo mupati/bapati balakonzya kubala caano kubalila mwana musyoonto naanka mwana musyoonto ulakonzya kubalila mwanaakwabo mupati/bapati. Cimwi ciindi inga ncibotu kucincaana akupana ciindi kubala akubalilana.
- Kosala kaano (kuzwa mubbuku yazyano na twaano) kalo kamukkomanisyu na nkomuyandisya nyoonse nyobilo naanka amupunge kaano kanyowana. Kalakonzya kuba kaano kamasimpe na kabwini naanka katali kamasimpe.
- Utalubi kucincauzya jwi kweendelanya akaambo nkowamba ciindi noana. Ino mbubuti jwi mbotilicite kutegwa lilimvwisye mbuli lya shuumbwa, kutegwa lilimvwisye mbuli lya mudaala, a mbuli lya sulwe uyoowede?
- Cimwi ciindi leka kwaana a kubuzya mibuzyo mbuli yooyu 'ncinzi ncoyeyya kuti inga kaciyoocitika kuzwa waawa? Amusoleke kuyeeyela akwaamba cilangilwa kicitika mucibeela ciccilila mucaano antoomwe.
- Apepa litobela kuli kaano komwe nkomukonzya kubala antoomwe. Amubale cibeela cacaano cijisi bulembu buzubulula mubunji mutwe wacaano, amuumune akuleke kubala kwakaindi kasyoonto kamutana bala mamanino a caano akuyeeyela na kwaamba mbuli mbomuyeyya caano kuti mbociti mane.
- Amubale mamanino a caano. Sena mwacikonzya kuyeeyela na kwaamba kabotu? Sena inga alimwi mwacikonzya kicipa mutwe wamakan eeci caano?

Kwiindilizya kucita maciti apedwe: Sena inga mulakonzya kubikka caano eeci ncomuyandisisya mucisobano antoomwe abeenzinyoko? Amuzuminane zibeela zyacisobano aumwi ncatisobane akutalika kusoleka kucisobana caano. Amucisobane cisobano eeci kumbele abamukwasyi wenu kutegwa bacibone.

Caano 1: Mwaaba a Sulwe mumwaka wanzala (Caano cakaindi)

Mumwaka umwi munyika imwi imvwula tiiyakawa bweelede pe. Eeci cakapa kuti kubule cakulya akuleta nzala mpati yakali kuunzya kasuko mucisi eeco. Kwakali buyo balimi basyoonto bakacikonya kutebula mumyuunda yabo. Eeci cakali kwaamba kuti bunji bwabantu bakanyina cakulya muuuunzi oomu. Bamwi bantu bakatalika kupona buumi bwakubba mumyuunda yabeenzinyina kutegwa babe acakulya. Pele muuuunzi oomu mwakali kukkala ba Mwaaba a Sulwe. Abalo bakali anzala mbubwena buyo mbuli muntu oonse muuuunzi. Eeci cakapa kuti batalike kuyeeya mbobaali kunoojana cakulya muciindi eeci canzala mpati.

Sulwe wakayeeya muzeezo mbuli mbobanooli kucijana cakulya amweenzinyina Mwaaba. Munsi-munsi amunzi wabo kwakali kwiinda balimi bazwa kumuunda azikkochi buzuba abuzuba kutola cakulya kuminzi yabo. Mpoonya Sulwe wakayeeya muzeezo wakulala munzila akulicengeezya mbuli kuti ulifwide kutegwa balimi bamubona bamubikke mucikkochi. Wakali amuzeego wakuti bamubikka mucikkochi, asowe amwi masaka azyakulya kumbali anzila mpoonya mweenzinyina aabweze akwaasisa musyokwe. Amana kuwaala masaka obilo na otatwe, mpoonya asotoke akubweza masaka aalya amweenzinyina kwaatola kumunzi wabo.

Nicakamana cakulya ncobakabbide, bakayeeya kuti bainduluke muzeezo wakulala munzila akulifwisyafwisya kutegwa balimi baboola babweze akubikka mucikkochi alimwi.

Mamanino acaano:

Mulimi wakalyaambauzya kati, "Ndiza nkucengwa kale alimwi ooku kutegwa ndibbidwe cakulya!" Mpoonya, wakaambila mwana wakwe musimbi kuti amupe cisako cipati cakuumya Mwaaba ooyu wakalede munzila. "Ndiyanda kuzyiba masimpe na munyama ooyu ulifwide ncobeni", wakayeeya mulimi. Acisamu na cisako cipati eeci, mulimi wakauma Mwaaba caluciso pele akaambo kakucisa, Mwaaba wakakiila akutijila musyokwe kuwuna buumi bwakwe,

Kuzwa ciindi eeco, bantu, Mwaaba a Sulwe cilongwe cabu mpocakamanina aawa!

Caano 2: Tambuli, mwana aMuzowwu:

'Utasoli kunjila mumulonga' bakazumanana kwaambila mwanaabo Tambuli bamaama ba Muzowwu. 'Omuya mumulonga muli ntale na ciwena mupati ulakujata akukulya.' Pele Tambuli walo wakayandisisya kuzyiba. Ino ntale na ciwena ncinzi? Kwiina wakali kukonzya kumwaambila pe. Mpoonya, wakainka kumulonga. Wakaimikila munsi-munsi ankomwe yamulonga. Alimwi wakaswenesa munsi-munsi. Pele naakalanga mumulonga wakabona buyo busyu bwakwe mumaanzi. Alimwi wakaswenesa munsi-munsi mpoonya mukaindi buyo kasyoonto.....ntale na ciwena wakalibonya kajulide mulomo wakwe cakukwazamuka.....Kwap! Ciwena na Ntale yakamuluma mpemo Tambuli. 'Maawe ndafwa' wakakwiila Tambuli. Banyina bakaboola kabazabuzuza. Nibakasika bakamujata kumucila. Banabokwabo basankwa bakaboola bazabuzuza akumujata nkiali kumatwi, akutalika kumukwela akukwela kapati pele ntale na ciwena takwe naakamulekezya pe. 'Amutugwasye' bakaita beenzinyina mpoonya mukaindi kasyoonto syokwe lyoonse lyakazula bagwasya kukwela.

Mamanino acaano:

Bakakwela nkiali kumucila cakapa kuti mucila ulampe mbuli katambo, bakamukwela nkiali kumatwi cakapa kuti akomene, ampemo yakwe yakalampa akulampuluka. Nibakakwela akukwela kwaciindi cilamfwu limwi ntale na ciwena wakailekezya mpemo. Boonse bakali kukwela bakawida atala aumwi amweenzinyina mubwizu. Tambuli wakafwutuka kuzwa mukanwa lya Ntale na Ciwena. Pele ncinzi cakacitika kukacila kakwe kakali kabotu akututwi twakwe twakali tusyoonto, a.....kumpemo? Nconciceeco kusikila sunu, bazovwu balaa mpemo zilamfwu ziitwa kuti moonono a matwi mapati mbuli matuvwu akabichi.

Musela: Misela yoonse

Kugwasilizya kwa batati/banabokwanu: Kuli mujulu kapati

Lwiyo ndotijane akwiya: Kusumpula mulaka ubelesyegwa, caano mboceelede kuba, kuyeyela cintu mbociyakuba, zisobano

Nzyoyelede kusoleka kucita: Kusungwaala, kubekelaamwi abeenzinyoko, kubekelaamwi, kuswiilila

Kuvwima cintu ncoyandisisya

Zibelesyo ziyandika: Mapepa azilembyo mbuli pensulo

Cakucita na zyakucita:

- Kuvwima cintu ncoyandisisya ndeeliya notalika kweenda kuyandaula zintu nzyolembede amundando wazintu ziyandika. Ulakonzya ‘kuvwima’ mukati naanka anze. Kuti na mulawwima abamwi bantu, inga wasaanguna kuzijana zyoonse zilembedwe amundando nguwazunda.
- Langa cilembedwe amundando wazintu nzyoyanda. Olikke na abeenzinyoko, citola ciindi cilamfwu buti kuti ukonzye kuzijana zintu zyoonse zilembedwe amundando?

- Cintu camubala wajulu na meenda
- Cintu citeteete
- Zintu zyobilo zipangidwe azisamu
- Cintu cinona kulya
- Zintu zyotatwe zitalisya abbala lya P
- Cintu cimweka
- Cintu cibelesyegwa kusalazy a zintu
- Cintu ncoyandisisya

- Ikuti na walikulangaula zintu nzyoyandisisya, aumwi muntu, alange na nzyomwajana zilakozyanya.
- Lino kobamba mundando wazintu lwako omwini. Kubelesya mabala aaya (citeteete, cinona, cimweka) a mibala na misyobo-misyobo inga caba cintu cibotu kutalisya. Kolanga amikozyanyo imwi iili atala kutegwa ndiza inga ulakonzya kulemba mundando wazintu nzyoyandisisya zisika ku kkumi (10) nzyotiyandaule.
- Kolemba mundando wazintu nzyoyandisisya wamana ubuzye umwi muntu kuti akazilangaule zintu eezi.



Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa (tubala tupandulula zintu mbozibede amasena)

Nzyoylede kusoleka kucita: Kusungwaala, kumana mapenzi na makatazyo, kubelekelaamwi

Bumbi mbokonzya kucita maciti aaya:

- Sala buyo zintu zikonzya kujanwa mukaanda komwe kali mung'anda mpati
- Tondeka kuzintu akwaambila umwi muntu kuti akubwezele zintu eezi
- Kwaamba (ambilia umwi muntu) zintu nzyoylede kulemba amundando kulembela nduwe

Namba yamaseseke (Mpasulula balozi)

Zibelesyo ziyandika: Zibelesyo ziyandika: zilembyo mbuli pensulo amapepa


Cakucita na zyakucita:

Kuli nzila zinji nzyomukonzya kulibambila na kulipangila namba ya maseseke yenu nyolikke.

- Mulakonzya kugwisya akubikka cimbi cintu atubala twamu aufabbbeti kubelesya manamba pele amutalisye manamba mapati na aali mujulu akwaalemba mbwaaya kuceya kujokela munsi. Kupa buyo mukozyanyo, bulembo bwacikuwa bubelesya tubala twa aufabbbeti tusika kutubala tuli makumi obilo acisambomwe (26), nkokuti $a=26$, $b=25$, $c=24$, $d=23$, mbubwenya oobu. Sena inga ulakonzya kulemba bbala linga lilazwe mumanamba na manamba aaya ncaamba? 8 22 24 9 22 7 24 12 23 22

a	b	c	d	e	f	g	h	i	j
r	ɔ	≈	◊	ε	č	II	迢	ø	⊖
k	l	m	n	o	p	q	r	s	.
σ	≈	▷	Ҥ	○	ε	ԝ	♂	□	
t	u	v	w	x		y	z		
△	♀	♀	ԝ	Ӣ		♀	□		

- Ulakonzya alimwi kugwisyia tubala akubelesya tumbi tubala twa aufabbeti njiyona pele bona masimpe kuti tulacililana kabotu, kupa mukozyanyo **a=h, b=I, c=j, d=k, e=l, f=m**, cilaya mbubwena oobu.
- Ulakonzya kubamba zimwi zitondezyo zinyowana ziiminina tubala twamu aufabbeti mbubwenya mbuli mukozyanyo upedwe. Kuti wasala kulibambilila ziiminina tubala, libuzye mibuzyo eeyi:
 - ⊖ Sena kazila kamaseseke angu kakalembwa kuzwa kulumwesi kuya kululyo? Naanka kuzwa atala kuya ansi?
 - ⊖ Sena ndibelesye zitondeezyo zyeelene atubala tuli mu aufabbeti? Naanka ndibelesye zitondeezyo zinji pele kaziiminina kabala komwe? (ee ci cica kuti kacitali cuubauba kuzyiba namba yamaseseke)



- Sena ulakonzya kubamba mabala mucitonga kubelesya zitondeezyo nzyoopegwa atala? (Kutaluba, toopegwa oonse maseseke pe!)
- Bweza zilembyo mbuli pensulo apepa mukulibambilila. Lemba namba yamaseseke aako mubulamfwu. Wamana lemba twaambo 'twamaseseke' alimwi bona kuti naa bambi bantu inga bacikonzya kwiizyiba namba yako yamaseseke.

Musela: Misela yoonse

Kugwasilizya kwa batati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa; kulemba, kwaamba mabala mbwaalembwa

Nzyoyelede kusoleka kucita: Kusungwaala, kukwabana kabotu mumyaambo, kumana makani na makatazyo

Bube bwazintu a mapatani aali munyika

Zibelesyo ziyandika: Tusamu a mabwe

Cakucita na zyakucita:

- Koya anze. Ino nzintu nzyongaye zibambidwe bwiindene a mapatani ngokonzya kubona munyika mbubonya buyo mbwiilengedwe? Alimwi ulange zintu zizwida musyokwe lya nyika eyi nzyojisi amunzi na ang'anda yako, mbuli micelo iiligwa a cisumani.



- Zili zyongaye zintu zibambidwe bumbi amapatani nzyokonzya kwaamba mazyina? Sena ulakonzya kujana cimwi ncokonzya:
 - ↪ Kuvwunga kabotu-kabotu akati kutegwa ceelane?
 - ↪ Cijisi patani ibe ilazunguluka wacilanga?
 - ↪ Cilibonya mbuli ninga na nweenwe?
 - ↪ Cila patani ibaanka ilaliinduluka ziindi zinji wacilanga?
 - ↪ Cila patani iili mbuli bube bwa nyenyezi naanka bube bwamoyo?

- Sena wabona mbuli matuvwu amwi ncaalibonya mbuli masamu naacili masyoonto? Sena ulakonzya kujana tuvwu liliboobu? Sena inga ulakonzya kubala tubeelabeeela tujanika acisiko catuvwu?
- Bwezelela tusamu amabwe. Ino mbube buli buti mbokonzya kubona kulanga tusamu ootu amabwe aaya? Sena inga wapanga na kubona:
 - ⊖ Cintu cilaa mabazu otatwe na one,
 - ⊖ Cintu cilaa mabazu osanwe (5)
 - ⊖ Cintu cilaa mabazu aali cisambomwe (6)
 - ⊖ Cintu cilaa mabazu aali lusele (8)



- Sena inga ulakonzya kubamba na kupanga zintu zinga muntu ulajata amaanza kumvwa cabambwa kubelesya tusamu a mabwe?

Musela: Misela yoonse

Kugwasilizya kwa batati/banabokwanu: Kusyoonto maningi

Lwiyo ndotijane akwiya: Mazina abube bwazintu, mabala aapandulula mapatani

Nzyoyelede kusoleka kucita: Kusungwaala, kumana mapenzi na makatazyo, kubelekelaamwi.

Caano cizunguluka kwaana

Zibelesyo ziyandika: Zilembyo mbuli pensulo amapepa

Cakucita na zyakucita:

Ulakonzya kucita maciti aaya abantu bambi bali botatwe naanka kwiinda waawo. Amukkale antoomwe cakuzinguluka mbuli ninga kamulangene..

- Omwe akati kenu ulatalika kwaana kaano, kupa buyo mukozyanyo, "Cimwi ciindi kwakali musimbi walo wakali kujana mapenzi koona. Ooyu musimbi wakali kunga wasalama akubbandama akubbindamuka pele kwiina nozyakali kuboola ng'onzi".
- Leka kwaana lino. Ambila umwi muntu wabili kuti azumanane kwaana kwamizila yatwaambo yobilo na yotatwe buyo, kupa mukozyanyo,

"Wakazumanana kulanga mweezi mupati wakali kumunika loko. Kacilangide kumweezi wakabona cintu cakaloka kuzwa kumweezi kuza kulinguwe. Cakali cintu cili mbuli malele kaciselemuka, kaciselemuka, kaciselemuka, kugama kuzoojinka ampulungwido yakwe".

- Lino amulekele umwi watatu kuti awalo ayungizye na aane naanka kulekela wacitalika caano kuti azumanane kuti kamuli buyo nyobilo nomwaana. Ino caano eeci inga ciyoosika kuli kusikila mpomuyooyeeya kuti mugole?
- Ambila umwi muntu kuti lino acigozye caano mwabona kuti nyoonse mwaana kale kuziindi zisika kuli zyobilo.
- Milawo ya 'Caano cizunguluka kwaanwa' njeeyi:
 - ↪ Belesya kweezeezya kwako, kufwumbwa ncoyeeya inga cagwasilizya!
 - ↪ Amubone kuti caano ciya kumbele (tokonzyi kwaamba kuti, 'musimbi ooyu wakatanta malele' mpoonya waumuna pe, weelede kwaamba kunji kwiinda waawo mbuli 'musimbi ooyu wakatanta malele mane waakusika mpaali atala alo mpaakakonzya kubona.....')
 - ↪ Utaambi caano coonse pe, kosiya cibaka cakuti umbi uccilila awalo azumanane kwaana

- Inga mwasala kufwumbwa musyobo wa caano. Cilakonzya kuba caano cakacitika kumwi kubusena (mbuli cizyano cacuundu naanka lweendo lumwi) naanka camunyama naanka cakuliyeeyela buyo mumutwe.



Musela: Bana baku Primary

Kugwasilizya kwa batapi/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa, zyaano mbozibede amilawo ya kwaana: Nyzyokonzya anzyotakonzyi kucita nomwaana kufumbwa kuti caano catalikwa kale.

Nzyoyelede kusoleka kucita: Kuyeeya kufwambaana, kusungwaala, kukwabana kabotu mumyaambo a kubelekelaamwi

Bumbi mbokonzya kucita maciti aaya:

- Bikka zintu zisyoonto zisika kukkumi (10) nzyokonzya kujana munsi-munsi ang'anda yako akuzibikka mukabeeke – kufwumbwa nzyokonzya kujana, (kupa mukozyanyo nkapu, ibbwe, kasani..); eno amugwisye zintu eezi comwe-comwe aumwi aciindi cakwe kuzwa mubbeeke, kufwumbwa buyo mwagwisya cintu comwe eeco cinyowana kuzwa mubbeeke amucibelesye kumugwasya kusola kuyungizya muzila munyowana naanka mizila yobilo kucaano. Kupa buyo mukozyanyo, 'kaimvwi atala amalele musimbi ooyu wakabona nkapu, nkapu yangolide alimwi yakali kukunka meenda anyengema angolide....'
- Lemba apepa icaano ciinda Kubota calo ncomwapanga antoomwe. Amusanganye mabala aamba mbocibede cintu ayaayo apandulula mulaka wabelesyegwa kuteqwa ciindile Kubota akwiininizya caano.

Ikulumba muntu ulaampuwo mucooko

Zibelesyo ziyandika: Mapepa a pensulo

Cakucita na zyakucita:

- Muntu ulaampuwo mucooko motukkala ulakonzya kuba muntu buyo wakagwasya bamwi bantu bamuooke naanka inga kali muntu wakazumanana kuli ceeco ncacita nokuba kuti wakali kujana makatazyo. Kufwumbwa muntu inga wabaa mpuwo. Sena kuli muntu ngozi uliboobo?
- Koyeeya kujatikizya muntu ulaampuwo mucooko mokkola. Ino nguni ooyo? Ncinzi ncaakacita caamupa mpuwo? Ncinzi nconyomenena cijatikizya muntu ooyu?
- Ino mbubuti mboyanda kulumba muntu ooyu ulaampuwo? Sena ulazekula na kweenga cifwanikiso, na kulemba cikwaankwani naanka kwiimba kaimbo kalumbaizya zintu nzyobakacita mubuumi bwabo? Ndiza kulemba lugwalo naanka kubapa cimwi cipego cakubalumba? Ndiza uyanda buyo kwaamba majwi akuti 'twakulumba'.
- Panga cipego/lemba lugwalo lwako wamana ujane nzila mbotu 'yakutola' cipego eeci kumuntu ooyu ulaampuwo. Kolomba muntu mupati naanka mupati wako na mwanaakwenu mupati kutegwa akugwasye kutola cipego eeci.



Musela: Bana baku Primary

Kugwasilizya kwa batapi/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa

Nzyoyelede kusoleka kucita: Kukwabana kabotu mumyaambo, kusungwaala, kusumpula luse abuuya

Kuvwima cintu ciyandisi

Zibelesyo ziyandika: Zilembyo mbuli pensulo amapepa

Cakucita na zyakucita:

Kuvwima cintu ciyandisi ncisobano calo bacisobana nkobayandaula zintu zisisidwe kwiinda **mukutobeleyza zimwi zipa mizeeo acintu mpociyeeyelwa kujanwa**. Kufumbwa kuti muzeezo umwi wautobeleyza ulakupa umbi muzeezo ukutola munsi-munsi aacintu cilangaulwa mane kusikila ucijane cintu ciyandisi. Eeco ‘ciyandisi’ ncojana kumamanino inga kacili cintu ncoyandisy - ndiza kantu buyo kasyoonto kayandisi naanka cimwi ncokonzya kulya (pele bona masimpe kuti canoosisidwe kwiina munyama uuticijane kotana cijana yebo lutaanzi).

- Koyeeya kuti ino nguni ngoyanda kuti akugwasye kuyandaula cintu ciyandisi - sena musyoonto naanka mupati wako? Sena mbapati? Uleelede kuti ulembe mizeeo igwasilizya kutondeka kooko ciyandisi nkocisisidwe alimwi kaili mizeeo yeendelana amusela wabana njobakonzya kumvwa akutobeleyza kabotu-kabotu (amubone mikozyanyo ipedwe munsi).
- Koyeeya **busena mboyanda kuvwimina cintu ciyandisi** – sena mung’anda naanka anze naanka kufumbwa busena?
- Sala **zibaaka** (masena aatibikwe mizeeo Isola kutondezya) **zyakuvwimina cintu ciyandisi**. Sena kunze acisamu cipati, kunze akkabati mung’anda, naanka muzeezo usola kutondezya unooli amuntu umwi wamukwashi wanu walo utajaniki mucisobano cakuyandaula. Mizeeo isola kutondeezya inga yabikkwa muzibaaka zitaindi kulusele (8). Lemba masena aaya akwaapa manamba aacililene kabotu-kabotu.
- Lemba mizeeo ijatikizya cibaaka acimwi amapepa aindene. Amubone masimpe kuti mizeeo eeyi ilakonzya kumvwugwa kabotu-kabotu ‘abasobana’ pele itabi mizeeo myuubauba maningi! Kupa mukozyanyo:
 - ⊖ Muzezo: **Ndiji mucelo unona, mucelo ulamatila** (Cibaaka na busena: mucisamu ca Mango)
 - ⊖ Muzezo: **Aawa mpolotela masiku** (Cibaaka na busena: bulo)

Ulakonzya kubelesya kabbokesi (mwalo mwakusanganizyila tubala tupanga bbala). Kupa mukozyanyo:

⊖ Muzeezo: **DELABBOKA ANZIKAMA** (Cibaaka na busena: kabbodela kamaanzi)

- **Ipe manamba mizeeza itondezya** akwiivwunga kabotu kutegwa kakulibonya buyo namba. Ulapa basobana cisobano eeci muzeezo wakusaanguna uutisole kubatondezya muzeezo ucilila kaciya buya mbubwena oobo.
- **Koyobola muzeezo wakusanguna mucibaaka mpeweleded akusisa mizeeza yacaala** muzibaaka na masena kuccilizyanya manamba mbwaatobelana – belesya mundando wamizeezo ngoolembede kale kutegwa ukugwasye kuyeyya aakusisa mizeeza yako. Muzeezo uli a namba 1 mpotisise muzeezo wa namba 2. Muzeezo uuli a namba 2 mpotisise muzeezo wa namba 3 mane kaciya mbubonya oobo. Muzeezo wamamanino mpoyoosisa ‘cintu ciyandisi’.
- Kuti kakuli basikusobana bainda ali omwe, nkokuti **amuzuminane milawo iitibileke** antoomwe. Mulawo inga unooli, kupa mukozyanyo:
 - ⊖ Tweelede kulindilana katutana zumanana kuyandaula muzeezo ucilila.
- Kopa muzeezo wakusaanguna. Koya wendeende aumwi ngomusobana limwi/ basikusobana kubona kuti kwiina wakakilwa alimwi kayanda kugwasigwa kutegwa azyibe cakucita na amvwe kabotu muzeezo.

Musela: Bana balaa myaka kkumi (10) akwiinda

Kugwasilizya kwa bapati/banabokwanu: Kwaakatikati

Lwiyo ndotijane akwiya: Kusumpula mulaka ubelesyegwa; kulemba, kwaamba kabotu mabala mbwaalembwa

Nzyoyelede kusoleka kucita: Bulondo, Kutobelanya kucita zintu, kusungwaala, kuyeyya kwiindilide, kukwabana kabotu mumyaambo, kubekelaamwi, kumana mapenzi na makatazyo

Bumbi mbokonzya kucita maciti aaya:

- Kolomba umwi muntu kuti akugwasye kulemba mizeeza itondezya
- Ulembe buyo mizeeza yotatwe (3) naanka yone (4)
- Utavwimi cintu ciyandisi mbuli ‘mukuccililana’ pele aumwi muzeezo kaukonzya buyo kutondezya kantu kasyoonto ‘kavwimwa’ – eeci inga cacita kuti cisobano cuubaube kucibamba kacitanasobanwa.

Mibuzyo iili makumi obilo

Zibelesyo ziyandika: Kwiina/taakwe


Cakucita na zyakucita:

Eeci cakucita inga cacitwa kabotu kuti kakuli basikusobana kabasika kuli bobilo kusikila kuli bosanwe kutegwa boonse bajane ciindi cakubuzya mubuzya.

- Ulakonzya kusala kufumbwa muntu kuti asaangune kubuzya. Kupa buyo mubuzyo, ucili musyoonto naanka muntu waazwa kusekelela buzuba bwakuzyalwa kwakwe calinolino na mazuba masyoonto ainda.
- **Kosala muntu, busena, naanka cintu.** Yeeya muntu naanka cimwi cintu ncozyi kabotu kutegwa kube kuvwuwa imwi mibuzyo myuubauba kujatikizya cintu na muntu ooyo. Kuti na wasala muntu, ulakonzya kuti kapona na wakafwa, naanka caano cakulipungila buya (kuzwa muzyaano). Bona masimpe kuti wasala muntu, cibaaka na busena, naanka cintu eeco bunji bwabantu mbomulaamwi balicizyi cintu eco.
- **Kilibamwi kobuzya mibuzyo yakuzumina buyo kuti iyi naanka peepe.** Kotalika amibuzyo izibidwe ‘yakulisalila’ kuvwiila ikonzya kuvwiilwa kuti ‘iiyi’ naanka ‘peepe’. Kupa mukozyanyo:
 - ⌚ “Sena muntu?”
 - ⌚ “Sena ncibaaka na busena?”
 - ⌚ “Sena ncintu buyo?”
 - ⌚ “Sena ncabwini na ncakuliyeeyela citanabwenwe?”
- **Kamupana ciindi cakubuzyanya mibuzyo ivwiilwa kuti iyi naanka peepe.** Amubone masimpe kuti aumwi uusobana wabuzya mubuzyo omwe (1) buyo. Kuti na sikusobana musobano wabuzya mubuzyo walo utakonzyi kuvwiilwa kuti “iiyi” naanka kuti “peepe”, amumwaambile kuti aubuze bumbi kutegwa ukonzye kuvwiilwa boobo. Kupa buyo mukozyanyo, sikusobana wakakilwa kubuzya kuti, “Ino balaamyaka yongaye?” pele inga wabuzya kuti, “Sena balainda kumyaka iisika kumakumi osanwe?”

■ **Kobuzya mibuzyo yacigaminina musobano mbuuyabuya.**

Koyeeya mibuzyo yalo yabuzigwa kale kotanabuzya mibuzyo minyowana. Kupa mukozyanyo, kuti umwi muntu waluubuzyide kale mubuzyo ujatikizya cintu mbocili cipati na cisyoonto, amubuzye imbi mibuzyo ijatikizya mubala naanka zintu zyakabelesyegwa kubamba cintu eeci.



■ **Amusobane cisobano kusikila mibuzyo iili makumi obilo ibuzigwe naanka umwi muntu wakonzya kupa kwiingula kuluzi.**

Amubale mibuzyo yoonse antoomwe. Kuti na kabunga kasika kumibuzyo iili makumi obilo kwamana bakakilwa kwiingula kabotu muntu waambwa, cibaaka na busena bwaambwa, naanka cintu caambwa, amubaambile bwiinguzi bweelede. Pele kuti na umwi wabo waingula kabotu kabatanasika kumibuzyo iili makumi osanwe, nkokuti musobano wamana.



■ **Amucite kuti ooyo waingula mibuzyo kabotu nguyeleded kubuzya mubuzyo ucilila.**

Kuti na taakwe wamuzyiba muntu, busena, naanka cintu ciyandaulwa, kufumbwa muntu akati kenu inga wabuzya mubuzyo ucilila. Aumwi muntu aapegwe ciindi cakuyeeya cimwi cintu. Kupedana ciindi cakuti aumwi abuzye mubuzyo cipa kuti cisobano kacisanganya muntu oonse alimwi cipa kuti ciboteleye kumuntu woonse uli mucisobano eeci!



Musela: Misela yoonse

Kugwasilizya kwa batapi/banabokwanu: Kusyoonto maningi

Lwiyo ndotijane akwiyya: Kusumpula mulaka ubelesyegwa, zibeela

Nzyoyelede kusoleka kucita: Kukwabana kabotu mumyaambo, kuyeeya kwiindilide, kumana mapenzi na makatazyo

Bumbi mbokonzya kucita maciti aaya:

- Amubone kuti mibuzyo ibuzigwa igamide cibeela comwe, mukozyanyo ndiza 'banyama', 'cakulya' naanka 'bantu balaampuwo'. Amubaambile basikusobana kuti ncibeela nzi cili mucisobano.
- Amusobane cisobano eeci mutubunga-bunga tujisi bantu bobilo bobilo kutegwa kamugwasyanya mwatalika kusobana.
- Amwiindilizye kusobana cisobano eeci kwiinda mukubuzya mibuzyo yiinda kumakumi obilo kutegwa mujane ziindi zinji zyakusola kwiingula mibuzyo akwijana.

Kulembela bayi bako lugwalo

Zibelesyo ziyandika: Mapepa a pensulo

Cakucita na zyakucita:

- Bweza pensulo apepa mukulibambila.
- Koyeeya kaambo nkoyanda kwaamba kubayi bako. Sena uyanda kubaambila kaambo kajatikizya nzyocita ecino ciinda noli ang'anda? Ulakonzya kubikkilizya twaambo mbuli tootu:
 - ⊖ Cintu ncokkomanina ciindi noli ang'anda
 - ⊖ Cintu cisesya kapati cakacitika
 - ⊖ Cintu cikatazya calo ncookakonzya kucita
 - ⊖ Cintu ncolangila kuti bumwi buzuba ciyakucitika
- Lemba lugwalo kalutondeezya ankoluya a buzuba mbulwakalembwa wamana ulembe azyina lyako alugwalo.
- Kuti kacikonzeka, sena inga ulakonzya kulutumina na kulutola kabotukabotu lugwalo oolu kubayi bako? Kolomba batapi naanka umwi mwanoowwanu kuti akugwasye kulutumina.

Dear Mrs. Vaper,

I thyed Tee nicks and I loved it. It was gummy when me and my Mum got tangled up in the sugar ball. I also thyed maths game, and all the different games on it. Some of them are difficult and some of them are really fun! I'm looking forward to making something out of next. yours

sincerely

This: 

Kwiindilizya kucita maciti apedwe:

- Sena ulakonzya kulemba lugwalo 'iwakuliyeeyela mumutwe' lusola kusandula lugwalo lwako mbuli kuti mbayi bako balulemba? Ubelesye mabala alo ngoyeeyela kuti bayi bako ngobanooli babelesya kusandula nduwe.
- Sena inga wakonzya kulemba lugwalo lusesya kubayi bako lupandulula cakapa kuti utalembi maciti aakulembela kung'anda? Koyeeya kaambo kakupa kalo 'kanyina amuya', kupa mukozyanyo:
 - ↪ "mpongo yakalya maciti akulembela kung'anda"
 - ↪ "iguwo na kambizyi kakali kuunga kakabweza maciti akulembela kung'anda"
- Belesya mukozyanyo wapegwa kukugwasya kulemba lugwalo

Nomuyandwa bayi

Ikaka amundilekelele nkaambo nsiindakacita
maciti aakulembela kung'anda

Ndausa kapati pele.... (ncinzi cakacitika?) ...

Ndiyaku ... (ncinzi ncoyoocita)

Ndamana wenu,

Lemba zyina lyako:



Musela: Misela yoonse

Kugwasilizya kwa bapati/banabokwanu: Kusyoonto maningi

Lwiyo ndotijane akwiya: Kusumpula mulaka ubelesyegwa, kulemba magwalo, kulemba mizila yamabala mukabotu, kwaamba mabala mbwaalembwa kabotu

Nzyoyelede kusoleka kucita: Kusungwaala, kulibikka mucimo caumwi

Bumbi mbokonzya kucita maciti aaya:

- Kwaambila umwi muntu mboyanda kuti lugwalo lulembwe (ulamwaambila amana akulembele lugwalo)
- Lemba kapepa kasyoonto kakuyeezya
- Zekula na enga cifwanikiso cakutumina bayi bako citondezya zintu zicitika kung'anda